

鼠疫彙編

R254.8

4-1

寶笈齋

編

芝盒題端



鼠疫彙編序

醫之爲術所以寄死與生醫之書必詳且盡而後可以濟人壽世者也若吾粵羅芝園廣文所著鼠疫彙編一書出垂十年活人甚衆如是書之議論醇正推究病源洞然有見一方之眼竊謂近日治疫者無能出其右也惜其書未行於閩人猶有所憾焉客冬我居停彥先明府不吝兼金倡爲鋟版以廣流傳庶使倉卒邁疾頃刻得以更生荒僻乏術不斃於庸醫之妄何便如之未嘗不爲濟世之一助也熹今梓事告成爰書數言於簡末

光緒辛丑元月中九守平倉主李澍青跋

周序

瘟疫者時氣也時氣徧行所以人感之而卽病夫瘟疫者
溫也疫者役也故瘟疫之作始必發熱無分男女少長
率皆相似如役使然是又謂之溫役也刺法論黃帝曰
五疫之至皆相染易無問大小病狀相似且病是證者
多起於冬不藏精及辛苦飢餓之人蓋冬不藏精則邪
氣乘虛易入而飢餓勞倦之流則受傷尤甚故大荒之
後必有大疫正謂此也但此輩疫氣旣盛勢必傳染又
必於體質虛濁者先受其氣以漸徧傳若不施救療蔓

延滋甚余家世岐黃留心攷述每臨編得其法未必見其病臨病見其證未必合其方適嶺南兩山世丈以是編見示展誦之餘其於治疫之法明如指掌且經屢驗時值泉郡是疫又作思製藥施送恐難普遍居停彥先譚明府仁愛爲懷毅然創首爰集同人付梓惠世誠爲活人之要術也是爲序

光緒二十六年冬月東陽周樹梓桐甫誌於豐州署齋

原序

疫由陰陽愆伏而作也，或中血，或中氣，感其毒者，皆足

以害人，顧其時同，其地同，其證同，其藥亦宜無不同，方觀

書所載每次止必拘拘切脈施方，無當也。鼠疫者，鼠死

而疫作，故以為名，其證為方書所不載，其毒為斯世所

駭聞，鄉復一鄉，年復一年，為禍烈矣，為患久矣。予初聞

此，徧閱方書，無對證者。光緒十五六年，延及邑之安鋪

十七年春，延及縣城，偶見醫林改錯一書，論道光元年

京師時疫，日死人無數，實由熱毒中於血管，血壅不行，

治病切脈
古法必兼
惟瘟疫一
證邪閉清
竅脈伏而
端亦有閉
甚無脈者
且當壯熱
血脈絞債

切亦不准
況此明係
血壅不行
更不必切
所以昔賢
治瘟疫多
舍脈而從
證也

夫已壅不行，必然起腫。予始恍然焉。蓋鼠疫一證，初起紅腫，結核如瘰癧，或忽起於不自知，或突起於所共見。其潰者流瘀血，非熱毒成瘀之明驗乎？其甚者熱憎而斃，非熱毒瘀血攻心所致乎？及觀其方，專以治血為主。略兼解表，信能治此證矣。試之人人皆驗，因錄示人人。疑謗也。十七年冬，遇吳川友人吳子存甫於郡，出所輯治鼠疫法一編，予讀而善之，遂與茂名許子經畚論列此方，隨證加藥，囑書其後，而附於諸君子之末。爰捐貲寸刻，以廣其傳。十九年春，城鄉疫復作，同時屢用此方。

以起危證一時閩傳求者踵相接廼卽人疑謗者再加
辨解且取姪啟沃所經驗塗瘳一方以補之姪啟觀復
刻印發遠近流傳用之多效二十年予族陀村感此證
者數百用之全效故舊歲宏豐號有辨惑說之刻本年
友人文子鳳笙有同育堂之刻安鋪醫局有敦善堂之
刻化州局亦有刻人愈信傳愈廣焉予思此方雖妙惟
一誤於醫者之蠱惑再誤於病家之遲疑以致死亡相
繼實堪痛恨予留心此證久矣數年所歷更有聞見前
緣平糶之暇補原起釋疑二則並將陀村治疫之善法

與所傳之奇效及改方之貽誤就吳刻而增損之二十
一年陀村疫復作按治未效加藥方效故於施藥之時
續而增之復將十年前疫毒中氣之經驗方附諸卷末
俾知疫毒中於血氣者皆有所救則陰陽雖有愆伏而
血氣實可調和庶幾消災疹於無形躋民生於仁壽則
區區之心稍慰也如有不逮還期高明指示爰述其本
末而爲之序

光緒二十一年蒲月廣東石城羅汝蘭芝園續誌於村
堡別業之前軒

是書已四刻前序言之詳矣茲何爲而復刻也以近更
有所得不敢秘也二十一年夏四刻初成秋渡瓊候委
得悉是春海口以疫斃者數千族人和隆號電催此方
過海曾著效驗而瓊醫未之信也予慮其復而及他處
遂出四刻分贈同鄉各位皆以較前更詳公捐洋銀三
十大員囑代辦分贈予遂付信高郡聯經堂印六百本
並撮其要付省經韻樓刻印一千本旋以聽鼓多暇復
購書數種以考其詳更加添註冬至後瓊州府城疫作
先將所存分派瓊醫或從而笑之甚從而訾之予知其

誤於李時珍紅花過服之說、並誤於景嵩崖桃仁紅花不可過用三錢之說也、二十二年春疫大作、羣醫各出手眼、百無一效、以至死人無數、及二月底始有信避之法者、遷居海口、延予調治、並參新法、連救重危證數人、求醫者踵相接也、每視病開方、卽贈書一本、並囑照醫而十愈八九、一時並救數十人、羣疑始息、遂信是方、幸海口爲證無多、不致大害、因補前刻所未及、而求其詳爰爲之序、

光緒二十二年五月署理儋州學正石邑羅汝蘭誌

鼠疫彙編辨誤弁言

治病之道不知其誤卽不得其真凡治病皆然而治鼠疫爲尤甚蓋鼠疫一證前無所依後無所仿也是編因比類而得其方且屢經而詳其法時歷八載版已五刊雖云有誤諒亦寡矣乃作者無誤而用者多誤推求其故緣人多囿於常見狃於常習每以輕藥試重病緩服治急疾無怪其多誤也此其說於鄰鄉人得其詳焉本年鄰鄉多疫皆來求書贈卽囑曰必依法方效數日後多來問曰貴鄉用之極效某等用之不效何也予細詢

之曰、輕病、鄉人多不服藥、迨至重危、然後服藥、應加石
膏者、亦用五六錢、應加大黃者、亦用三四錢、其餘各證、
亦照法加入、每日迨二劑、熱稍退者、每日仍一劑、迨至
於甚、乃不服藥、予曰、噫、子誤矣、此重證、亦急證也、初起
不服藥、已失之、遲一誤也、重危之證、每日二服、已失之、
少二誤也、石膏大黃改輕、復失之、輕三誤也、熱退、尙有
微熱、至少二服、多則三服、日止一服、以至病翻、四誤也、
尙可服藥、卽不服藥、坐視其死、五誤也、若疫證初起之
時、凡喉微見燥、頭微見暈、體微見困、卽中毒之漸、急宜

服藥或服白茅根數味或服本方二三服此治於未萌
更人所易忽六誤也△△有此六誤尙云依方照法乎嗟乎
近者尙誤如此遠者可知補弁數言以免輾轉相誤也
戊戌春日芝園氏誌

凡例

一是編就吳存甫原本增刪、其首二方、統以大黃爲主、初證、必致邪內陷、故刪之、其原起避法治法生藥各方、實有可采、故存之、

一是方本於醫林改錯、原爲吐瀉抽筋而設、然移用此證恰合、故以爲主、

一吳本有疎漏處、參以己見、補原起論證、及禁忌釋疑二則、與陀村兩年輕重治法、及各處輕重治案十二條、茲又彙集前四刻而次第之、並補原起論、各家脈

論證治論及已悟活法，採用古法，俱見效者，添入數法，與瓊廉雷治案共五條，務求簡明，人人易曉，庶稍有準則，不致大誤。

一 是編所載有未備者，聞於眉批補之，徧閱方知其詳。
一 是編重複處皆關緊要，故存之，以寄反覆丁寧之意。
一 病有舍脈而從證者，以脈微而證顯也，况鼠疫起核紅腫大熱大渴，明係陽證，屬熱何疑，然人每以熱渴無核之證致誤，故略輯脈論數則，以明其初起亦與中風傷寒之異，所輯不多，亦以符疫證不切脈之例。

一時疫以吐瀉爲最急，輯驗方附後。有先見熱渴者，有先見癍疹者，宜於鼠疫治法條尋方加入。

鼠疫彙編目次

辨脈論 四則

證治論 附三焦證

原起論

鼠疫原起

避法第一

醫法第二

補原起論證及禁忌

歷驗良方

各證列

治法列

附六成湯方
補血湯方

復病治法

塗毒核疔瘡方

經驗敷藥方

治鼠疫毒輕法

治鼠疫毒盛法

簡便服藥方

生藥方

黃坡經驗方

水東經驗方

治疔瘡方

治出癍方

釋疑說

治案 八則

陀村治案 三則

瓊府治案 六則

廉雷治案

呂祖治時疫肚痛吐瀉方

附普提丸方並

治案

解毒活血湯方

回陽湯方

紫背萍驗方

送書感應說

閩粵治案

毒核消毒散方

消毒飲方

經驗疫證丸方

應驗疫證方

呂祖乩示疫證方

岳武穆時疫活命丸方

關聖文昌帝君乩示

疫方

經驗鼠疫方

治疫奇方

鼠疫毒核散方

毒核方

治疫核癰痧方

應驗疫核散方

治疫雷擊散方

治霍亂轉筋方

鼠疫痧證方

鼠疫驗方

鼠疫標蛇方

治疫方

辟疫散方

除疫救苦丹方

呂祖乩示辟瘟丹方

治陰證疫核方

治鼠疫毒核法

敷毒核方

急救轉筋鍼法

救疫證刮痧法

急救疫證熨法

治疫證酒熨法

治鼠疫白泡法

治鼠疫毛癩法

急救猪毛癩法

急救疹痧癩等證法

救毛疔毛癩法

時疫大熱證毛疔癩疹標蛇猪毛癩毒核方

救癩痧法並方

治大頭瘟方

急救羊毛瘟法

治羊毛疔法

辟疫法

治疫氣傳染方

辟疫香粉

辟疫靈符

避疫法

避疫常服方

附刻論鼠疫當清其源法

附刻治鼠疫驗方

三條

吳川吳宣崇子存原本

嶺南羅汝蘭芝園增輯

辨脈論

傷寒論辨脈篇曰寸口脈陰陽俱緊者法當清邪天氣

中於上焦肺與心也濁邪地氣也中於下焦肝與腎也清邪中上名

曰潔也濁邪中下名曰渾也陰中於邪中焦脾與胃也必內慄

也慄竦也經文止此首句論脈下數句言邪中三焦陰

陽為邪搏激寸口之脈必緊仲景論熱證止此數句而

不見方，想當時必有其書，但久經兵燹，故散亡耳。此後人所憑以診溫證之脈，卽憑以診瘟疫之脈也。

吳又可論瘟疫之初起，其脈不浮不沈而數，晝夜發熱，日晡益甚，頭痛身痛，其邪在伏脊之前，腸胃之後，熱邪傳表則脈浮而數，傳裏則脈沈而數。

吳鞠通論瘟疫初中上焦，脈不緩不緊而動數，或兩寸獨大，尺膚熱。註不緩則非太陽，中風不緊則非太陽，傷寒動數者風火之象，經謂之躁，兩寸獨大火克金也，尺膚熱尺部肌膚熱甚，火反克水也。傳至中焦，在表則脈浮洪躁甚，在裏則脈沈數有力，甚則脈體反小而實，更甚則脈沈。

伏或並脈亦厥傳至下焦或見沈實或見躁盛或見沈數或見虛大或結代或見細促甚有兩至與無者楊玉甫論瘟疫初起脈不浮不沈中按洪長滑數右手反盛左手總由怫熱鬱滯脈結於中故也凡浮診中診浮大長而有力傷寒得此脈自當發汗麻黃桂枝證也溫病初發雖有此脈切不可發汗乃白虎瀉心證也死生關頭全分於此若熱之少陰則脈沈伏欲絕非陰脈也陽邪閉脈也凡傷寒始本太陽發熱頭痛而脈反沈太陽證而見少陰脈故用四逆湯溫之若溫病始發未

嘗不發熱頭痛而脈見沈瀋而小急此伏熱之毒滯於少陰不能發出陽分所以身大熱而四肢不熱此名厥正雜氣怫鬱火邪閉脈而伏也急以鹹寒大苦之味大清大瀉之固不可誤爲傷寒見少陰而用四逆湯以溫之溫之則壞事矣亦不可誤爲傷寒見陽厥而用四逆散以和之和之則病甚矣蓋熱鬱亢閉陽氣不能達於四肢故脈沈而瀋甚至六脈俱絕此脈厥也手足逆冷甚至通身冰涼此體厥也卽仲景所謂陽厥厥淺熱亦淺厥深熱亦深是也下之斷不可遲非見真守定通權

達變者不足以語此手足微厥者不可下凡溫病中診
洪長者輕重則脈沈甚則閉絕此辨溫病與傷寒異治
之要訣也

按溫病始於太陰肺肺爲右寸仲景先師曰寸脈緊
緊者卽後人所謂數見汪訥菴素難經註吳又可云
不浮不沈而數吳鞠通云不緩不緊而動數楊玉甫
云不浮不沈中按洪長滑數右手脈盛於左手則初
證之脈數諸說所同惟右盛於左玉甫所獨則診鼠
疫初證之脈如見不浮不沈不緩不緊而數右盛於

左兼初起四肢痠痺可知無核之鼠疫矣至傳變諸脈三家大畧相同故不贅

證治論

溫疫者天地之戾氣濁氣釀爲熱毒中於人亦證見熱毒故曰瘟家家如是若役使然故曰疫其病皆熱無寒有表證無表邪宜解肌禁發表其輕者如赤眼發頤俗名猪頭之類其重者如頭腫俗名大頭溫頸脹俗名蝦蟆溫之類然祇見於一處一年未有見於處處年年如鼠疫之甚者噫可云異矣亦云慘矣其初起也有先惡寒者有不惡

寒者既熱之後卽不惡寒、有先核而後熱者、有先熱而後核者、有熱核同見者、有見核不見熱者、有見熱不見核者、有汗有不汗者、有渴有不渴者、皆無不頭痛身痛、四肢痠痺、其兼見者、疥瘡癰疹、衄嗽咯吐甚而煩躁懊懣、昏懵譫語、瞽亂顛狂、痞滿腹痛、便結旁流、舌焦起刺、鼻黑如煤、目瞑耳聾、骨痠足腫、舌烈唇烈、脈厥體厥、種種惡證、幾難悉數、無非熱毒迫血成瘀所致、故古方如達原飲、消毒飲、解毒湯、敗毒散、霹靂丹、近方如銀喬散、桑菊飲、升降散、清化湯等方、皆能清熱解毒、然用之間

有效而多不效何哉。以有清熱解毒之藥而無活血去瘀之藥也。可知用清解者尙誤。更可知用溫補者益誤矣。或曰有用涼劑愈者。此必熱毒初起。血未成瘀之時。或曰有用補劑愈者。此必熱毒已解。瘀血已下之後。然可偶效。斷不可常效。惟王勳臣先生醫林改錯活血解毒湯。雖制以治吐瀉抽筋之時疫。然移治此證。實爲得宜。觀其論證曰。熱毒自氣管達於血管。將氣血凝結壅塞不行。恰與此證合。觀其制方。則解血毒。清血熱。活血瘀。亦恰與此證合。十七年閱得此方。於無可救藥之時。

偶一試之不意其竟著奇效也。夫治病以本病爲重，標病爲輕，此證熱毒本也，瘀血標也。而標實與本同重，故標本未甚者，原方可愈；標本已甚者，又非原方可愈。故於重危之證，傳表宜加白虎，傳裏宜加承氣，傳心胞宜加羚羊，是不欲以輕劑治重病也。自後詳求博訪，十九年訪知西藏紅花去瘀捷效，又得塗核驗方，並試出重危之證，必要連追三服，遂增前法。是又不欲以緩服治急病也。廿年訪知生竹茹止吐，與漫用艾火，初用黃樸、見下瘀，遽用參朮，并各藥之弊。又見重危之證，三服人

多置手、遂將吳刻增損、除其統用下法二方、分別重危
證服法、補原起釋疑二則、治案九則、廿一年、試知誤艾
火、誤參朮、誤時日、皆有可救、強壯之重危證、三服仍熱、
與熱退復熱、及初起證見至危、又非前法所能效、並訪
知復病猝死之故、又增前法、並治案三則、是又合重劑
急服以治重急病也、以上所立之法、大綱已具、可十愈
八九矣、秋初渡瓊、賦閒無事、購書數種、悉心研究、更有
所悟、而著效益奇、前謂不可減少減輕者、爲初證言耳、
如連追後汗出熱清、可減除柴葛、毒下痰少、可減輕桃

紅並可加減以滋陰退熱亦可加減以補虛消核更得
清心熱法、清營熱法、表裏雙解法、三焦合治法、增液助
汗法、增液助下法、復脈救危法、厥證急下法、並善後二
法、稍爲增入以補前法之未備、雖未及詳細、祇取簡明、
庶治鼠疫者不混於他疫於世不無小補焉耳、
詳細
載下各證治法條內、

此證初起、熱渴痛痺、一時並見、重病也、重證而用輕藥、
必無望矣、且死人甚速、亦急證也、急證而事緩服、亦無
望矣、故法用急追多服、所以因其勢也、况重急之證、古

亦有日二夜一日三夜二服法急追多服並非自創尤
要初起卽急服藥蓋此時元氣未弱病根亦淺藥力易
行病勢易除一二日閒能追至七八服則熱毒或從汗
解或瘀從嗽出或從下行或下瘀血如仍未效第三日
仍追數服無不見效者蓋病在上焦故易治也且病愈
而人不弱倘遲服誤時至四日傳入中焦縱能治愈病
久人弱財費憂深生者病者已受無窮苦累矣倘再誤
至七日傳入下焦則病人愈弱病勢愈危縱遇明醫恐
難得半所以治病亦貴乘勢因時也三焦傳變大概如

是雖然亦有無定者，死人不必定在下焦，三焦皆有死證，病重藥誤，縱不卽死，亦有一二日卽傳中焦，二三日卽傳下焦者，吳又可云：病機之變幻無常，病情之反覆無定，有由表而入裏，由裏而出表者，總視其脈證如何，以定其疾病所在，斯醫治乃爲不悞耳。列三焦證於左。

上焦

金鑑以寸關尺三部分上中下三焦何部大屬何焦

脈不緩不緊，不浮不沈，而動數，尺膚熱，尺部肌頭痛身

痛，微惡風寒，熱渴自汗，日午後熱甚，間有不惡風寒，不

汗不渴者，舌胎白。

中焦

面目俱赤、語聲重濁、呼吸俱粗、大便閉、小便濇、舌胎老黃、甚則黑有芒刺、但惡熱、不惡寒、日晡益甚、

下焦

熱邪久羈、或下、或未下、或夜熱早涼、或熱退無汗、或身

熱面赤、口舌燥、甚則舌蹇囊縮、角弓反張厥、身神昏循衣

摸牀、舌縮耳聾、與二三日耳聾者異齒黑唇烈、脈見結代、或二至

或無

重危之證、初起、重劑急追、約十劑左右、效遲半日、必加

半遲一日必加倍、應重用輕、應急用緩者、亦如是。

原起論

昔之論瘟疫者、皆曰風寒暑濕燥火之六氣、自明末時、吳又可起、從而闢之、曰六氣者、天地之淫氣、常有者也、疫氣者、兩間之戾氣、濁氣、不常有者也、斯言也、徵之老子而可見、老子云、大兵之後、必有凶年、凶年之後、必有瘟疫、是知以兵燹而致旱澇、以旱澇而釀疵癘、此瘟疫所由起也、自後論疫氣者、皆主其說、陳修園先生更添病人之毒氣、又兼言夫繼起、不第言夫初起也、友人吳

子全甫據鼠死疫作直斷爲地氣言之鑿鑿亦不爲無見然律以動靜互根之義無天氣之鼓盪焉能使地氣之發舒則言地氣者必兼言天氣其說乃全但天氣遠而清人所難見地氣近而濁人所易見耳統而言之曰天地之氣足矣言疫氣所從入吳又可吳鞠通楊玉甫皆謂獨從口鼻入玉甫又據天氣爲清邪獨從鼻入地氣爲濁邪獨從口入修園謂天地之氣暗中摩盪從毛孔入病人之氣當面噴薄從口鼻入似不必拘蓋自其分而言則曰天地人之氣自其合而言則曰混雜之氣

何能隔別使何氣從口入何氣從鼻入何氣從毛孔入乎主口鼻入者對風寒由毛孔入而言別樣疫證可說得去惟鼠疫實說不去其先起核而後身熱者必由毛孔入由外而入內其先身熱而後起核者必由口鼻入由內而出外此證之犁然各別者也所論雖屬探原究無關治病之輕重管見偶及用以質諸高明

鼠疫原起

光緒十六年冬鼠疫盛行鼠疫者疫將作則鼠先死人感疫氣輒起癰癤緩者三五日死急者頃刻醫師束手

閒有打疵割血用大苦寒劑得生者十僅一二而已先是同治間此證始於安南延及廣西遂至雷廉沿海城市至是吳川附城作焉明年正月梅棗黃坡及信宜東鎮皆有之三月後高州郡城亦大作斃者每以二三千計離城市稍遠者染得病歸村鄉亦有之四月後則瘰癧者鮮死死死者又變爲焦熱衄血疔瘡黑斑諸證初有知廣西雷廉之事者勸諸人亟逃人皆迂之久之禍益劇乃稍信前說見鼠死則盡室以行且多服解毒瀉熱之品由是獲免者甚衆越端午乃稍稍息事後細詢中

疫之家乃歎曰信哉此地氣非天氣也何者同一邑也
城市者死山林者免焉同一宅也泥地黑溼者死鋪輒
築灰者免焉暗室蔽風者死居廳居樓者免焉况一宅
中婢女小兒多死坐臥貼地且赤足踏地也婦人次之
常在室也男子靜坐又次之寡出不舒散也且疫作時
其宅每熱氣從地升猛者如筒煙上噴緩者如爐煙繚
繞觸之則頭暈目赤而心燥急取涼風吹解病乃可救
當其時宅中人爲氣所感懵然不覺也旁觀者見熱氣
自足而脛而股而腰若不出見風熱氣逼至胸膈喉舌

埋鼠須擇
荒僻之地
塚要三尺
餘深使其
不能出

閒則病作矣。有平時在墟市得病者，昇歸家，其轎門逆風者愈，閉轎門者竟死。且有棺斂將葬，盜盡竊其衣服，夜得風露涼解，遂生者，其故亦瞭然矣。所可恨者，富貴之人，珍重太過，不敢見風，不肯服寒峻之品，遂至韞熱不救。至婢女得病，又慮其傳染，病未甚，卽棄置不顧。此真俗見之誤也。夫鼠穴於土中，受地氣獨早也。顧其死者，目必突而赤，頃刻有蛆，氣極臭穢，移置他處，轉面向風，勿觸其氣。嘗有鼠朽腐箱內，婦女開箱，觸其臭，卽暈。跌死，有見死鼠甚巨，舞摩玩弄而後瘞之，歸坐卽死。有

而感人此
是第一要
緊切勿拋
置路上及
糞草堆裏

鼠將死而貓噬之、貓死、人食其貓、人死、高州城外、墜鼠
處、牛齧其草、牛死、犬亦如是、彼鼠之生者、則渡水遠逃、
常銜青草、但不知此草何名、可以作治疫之藥否、所逃
之處、則皆清涼近水之區也、旣而匪徒徧傳放藥、藉端
滋事、人心惶惑、或謂是疫、皆毒藥所致、識者非也、所慮
者、廣西雷廉二十年來、皆十一月疫起、五月疫止、城市
者重、村落者輕、恐高州亦難免、後禍吾不知醫、無從剖
析方劑、姑就所聞於朋友者、述其避法治法於後、光緒
十七年冬、初廣東吳川吳宣崇識

凡看疫證
切勿對面
蓋男子疫
毒自口出
婦女疫毒
自陰出也
說見陳修
園醫錄

避法第一

避之之法當無事時庭堂房屋洒掃光明廚房溝渠整理潔淨房閒窗戶通風透氣凡黑溼處切勿居住聞近鄰有鼠死卽要時時照察埋鼠時掩鼻轉面勿觸其氣如誤觸其氣急取逆風吹散之此內經所謂避其毒氣天牝也鼻從來復得其往之法也並宜時常用如意油拭鼻以避邪氣家中人不可坐卧貼地奴婢小兒俱要穿鞋農人亦宜穿草鞋以隔地氣分界各村赤脚者多疫死後俱穿鞋遂安勢稍急卽宜遽避得大樹下陰涼當風處爲妙樹下避疫外夷

蜚家卽魚
戶也

此法尤妙

香港患疫
洋人將鋪
戶瓦面拆
開以洩地
中毒氣

法也驗之本地屋
在樹下俱平安

或泛舟水上尤妙否則居近水當風

處亦佳雷廉十餘年凡船戶及蜚家棚從無犯此證者

可知也水以大江大塘爲勝若止水小塘當疫發時無

不翻底黃濁者然仍勝於無水處若不得近水則嶺頂

四面當風處亦好

各鄉避居嶺坳者有禍
居嶺頂者安得風故也

居城者能上

城堞避之亦可

高州居城堞
者俱平安

倘無處可避則每日全家

男女俱出屋外有樹木處高坐吹涼夜閒回家仍要開

窗透風且用極幼細之沙厚鋪牀底將房閒屋瓦拆開

見天自然平安

此神授方
用之有驗

設避居他宅必須清涼疏爽

己亥夏惠郡當疫氣盛時有患夾色傷寒證而誤投治疫涼劑以至死者甚多房事尤宜戒慎李雨山誌

不可眾人擁雜一處，反易致病。倘或感病，卽時移出大樹下當風處，必要高牀高櫬，切勿近地。若近地，則感受毒氣，更速之死。觀避出而睡平地者，死反多於在家。其故可知也。平時不可食煎炒太熱物，不可飲冷凍湯水。男女或因房事感起者，難救。尤宜戒慎，節慾爲是。

四句要語：居要通風，卧勿黏地，藥取清解，食戒熱滯。

醫法第二

醫治之法，金鑑外科面部名曰時毒。他處呼爲瘍，子瘡卽此證。首用荆防敗毒散，繼以連翹消毒飲，透膿散，然不甚效。陳修

熱毒中血
壅不行
為病原
對此用藥
方免於誤

園醫書用白蓮鬚、白鴿屎、螺靨、萊諸方，亦不甚效。總之此證熱毒在血分，必以涼血解毒瀉熱為主。自原起至此皆吳本

補原起論證及禁忌

疫由天地之氣固矣。然天氣下降，地氣上升，此常理也。何如變而為疫？吾嘗驗於城市村鄉，開而知其故矣。蓋城市污穢必多，鬱而成疹。其毒先見，鄉村污穢較少，鬱而成疹。其毒次及。故熱毒熏蒸，鼠先受之，人隨感之。由毛孔氣管入，達於血管，所以血壅不行也。血已不行，漸紅漸腫，微痛微熱，結核如瘰癧，多見於頸脇臑膀大腿。

此時急治
百不失一
過此非重
卽危斷難
保全然按
譚加藥急
迫多服十
可救八九
危證以下
若誤時誤
藥非雙劑
急迫斷難
挽救久誤
多誤更難
措手

閒亦見於手足頭面腹背爾時體雖不安猶可支持病
尙淺也由淺而深愈腫愈大邪氣與正氣相搏而熱作
矣熱作而見爲頭痛身痺熱甚而見爲大汗作渴則病
已重矣若熱毒愈深瘀血愈甚泛見於外則有疔瘡等
證逆而妄行則有衄咯等證上攻心包則有譫語等證
下擾腸腹則有脹痛等證皆危證也若疫氣由口鼻氣
管入熱毒直達臟腑初病暴作熱渴痛痺昏懵等證或
疫證盛時猝不省人事手足抽搐面目周身紅赤皆未
見有核此初起至危證與病四五日卽見目瞑耳聾唇焦舌黑

等證

此因誤之至危證

其病爲更深其證爲更危甚而服藥卽

吐牙關緊閉亦可救救法見下各證治法條至脈厥體厥面青面藍與嘔血不止者更可知矣至危之證有熱後見核者其初實與傷寒傷風同然絕不同也蓋此由熱感咳嗽無鼻涕頭痛無項強渴甚喜飲冷熱後不怕風並見神氣昏迷手足痠痺且脈右盛於左相類而實不類其猝不省人事手足抽搐亦與風證脫證異蓋風證脫證面目周身不紅赤也細辨自知見核作熱在出痧痘之時亦宜服此方以此證至危至速此方亦兼治

痲痘卽有熱無核而慮其出痲痘驗之兩耳尾兩中指
尖不冷知非痲痘也服藥後口噉瘀血小便如血大便
下血婦女非月信血至係瘀血外行爲順證不必慮初
愈後手足微冷氣血未達也與本證之熱厥異與虛寒
之寒厥亦異對時自暖愈後七八日不大便精液未充
也與前之熱毒秘結異愈後身與足浮腫氣復而血未
復氣無所依附也與氣滯而鬱之氣腫異與水泛而溢
之水腫亦異二三日血復自消重危之證初不急追多
服日夜惟二服至六七日汗出瘀下病愈人困幾無人

色昏昏熟睡脈亦和緩無汗困也非脫也以上四證皆足駭人切勿溫補寒下破氣利水以致虛而又虛熱退復熱予見多矣無庸慌張惟食取清潤藥用滋陰安靜調養十餘日愈矣證已屬熱藥忌溫散如麻黃桂枝細辛羌活獨活防風荆芥陳皮半夏香薷香附及薑附桂參朮芪凡一切焦燥溫補之藥初不宜用卽熱未盡除核未盡消仍不宜用芩連苦寒清熱必用然苦寒化燥固不可多次用亦各有專經尤不可紊亂用見於吳又可吳鞠通之書黃硝善下攻邪必用然亦未可驟用蓋

惠不牛慰
郡患犬觀
患此之
疫證家
食
用艾灸
甚多

初病發熱邪尙在表遽下必陷入裏必見脹痛結流及脈厥體厥六證有一方可速下宜速下者不宜遲宜重下者不宜輕若老弱宜酌下切勿遲疑自誤卽退熱之藥亦有未可誤用如地骨皮能治骨蒸虛熱何首烏能退入裏陰邪此證誤用必引邪深入熱難退而足腫矣熱清核未盡消仍宜戒口雞鴿牛羊蝦蟳蔥蒜糯米麩酒凡生冷熱滯有毒等物切不可食初起微熱固忌艾火房事及熱初退尤忌冷粥熱粥此最蕎麥俗名三悲傷惱怒吵鬧犯必亦忌飽食炙火厚味犯必夫鼠疫陰

此方關鍵全在歸樸二味蓋歸為血中氣藥樸為氣中血藥血氣流通而病安有不愈乎
文鳳山誌
加西藏紅花貳錢更

也血亦陰也以陰感陰最為易入婦女屬陰中毒尤多故其證每起於陰盛之時而消於陽盛之候今將驗方證治列後

歷驗良方

初起切勿減少藥味減輕等分

連翹 參錢

柴胡 貳錢

葛根 貳錢

生地 伍錢

當歸 錢半

赤芍 參錢

桃仁 捌錢

尖打碎 去皮

紅花 伍錢

川樸 壹錢

甘草 貳錢

此方醫林改錯名曰解毒活血湯原方用枳茲改為樸均行氣藥以樸色赤取其入血分耳至輕重之數翹改

重而柴改輕亦以熱毒重邪氣輕之故非敢謬為更改

重而柴改輕亦以熱毒重邪氣輕之故非敢謬為更改

為速效

孕婦加黃芩桑寄生
各參錢以
安胎若疑
桃仁紅花
墜胎可去
桃紅改用
紫草茸紫
貝天葵各
參錢

也方內生地有熱用小的無熱用晒乾大的甘草有熱用生的無熱用炙的一取其清熱一取其滋陰也治法條所謂加者加於原方之內也並加者加外又加也照加者照上加也所謂輕加白虎者石膏伍錢知母參錢也重加者石膏壹兩兩餘知母伍錢也餘俱詳治法條桃仁紅花必重用石膏大黃有時必重用詳釋疑說條至重危之證必照方照法加重急迫方效尤以不誤藥不誤時為要煎藥尤宜得法一二三日病在上焦藥味取其輕清煎宜六七沸四五六日病在中焦藥味取其

稍重煎宜十沸七日以後病在下焦藥味取其濃重煎
十餘沸此方藥已大劑水用二碗半先用大罐煎合沸
數傾入小罐復入水大罐再煎再傾煎回大半碗服大
黃樸硝不宜久煎煎藥將好方入同煎二三沸可矣矜
羊角犀角石膏宜另煎久煎方能出味西藏紅花另用
開水泡透以全氣味均去渣和藥服
各證加法病退減法及善後法俱詳治法條復病治法
詳復病條

各證列

核小色白不發熱為輕證宜戒口戒色切不可忽亦宜

急治

核小而紅頭微痛身微熱體微痠痺為稍重證若面目

紅赤旋必大熱渴痛痺照重證治

單核紅腫大熱大渴頭痛身痛四肢痠痺為重證

多核焮紅隨時增長熱渴痛痺疔瘡起泡或白或黑破流黃水或突起如

奶及癰黑片疹紅粒鼻牙舌咯咯痰譫語說慳慳顛狂

腹痛腹脹稍痛脹大便結熱結旁流有糞汁無糞皆危

證若服藥後嗽咳嗽出下大便婦女非月信來血係毒

外出佳兆也不在此例

或陡見熱渴痛痺四證或初惡寒旋見四證未見結核及舌黑起刺循衣摹牀手足擺舞脈厥無脈厥身冷可按體厥也與疫證盛時忽手足抽搐不省人事面身紅赤不見結核感毒最盛壞人至速皆至危證

治法列

內宜服藥外宜塗敷

方附後

忌貼膏藥

病時忌食
粥飯米氣
祇宜食山
東粉及山
薯地瓜菜
豆湯

輕證照原方日一服稍重證日夜二服加銀花竹葉各貳錢如微渴微汗加石膏伍錢知母叁錢少則二三劑愈多則六七劑愈未愈不妨再服以愈爲度重證危證

石膏大黃
誰肯重用
連用然屢
試必多用
方效故特
改重
西藏紅花
去瘀最捷
瘀未外出
皆宜酌加

至危證初起惡寒照原方服柴胡葛根各加壹錢若見
大熱初加銀花竹葉各叁錢西藏紅花壹錢危證錢半
如無西藏紅花本方紅花可用捌錢或加紫草茸叁錢
或加蘇木叁錢亦可若熱渴至槽有汗並加白虎湯強
壯者石膏少柒錢知母少叁錢粳米伍錢本方甘草改
多壹兩知母多伍錢
叁錢是也疔瘡加紫花地丁叁錢疔黑者用鍼圍刺括
出毒血外用藥粉頻塗以拔疔毒小便不利加車前草
叁錢痰多加貝母叁錢危證本方翹芍地草各加壹錢
至危證四味各加貳錢並加重白虎竹葉銀花各叁錢

羚羊去瘀血
犀解百毒
皆能清熱
驅邪不獨
等證為尤
宜即熱渴
煩燥之時
皆宜三味
皆有財者
所宜酌加
也
此謔語熱
毒在上焦
故以治上
焦為主

羚羊角、犀角、西藏紅花各錢半，皆宜。日夜連三服。服後
熱渴仍不退，照原方雙劑合服。日夜各一服。惟柴葛歸
可照加倍。各酌減壹錢。樸酌減伍分。餘俱加倍。仍加重
石膏、知母、竹葉、銀花、羚羊角、犀角、西藏紅花也。雙劑服
後，熱渴仍不減，不妨雙劑。照加再服數劑。以熱渴退為
度。熱渴退而未清，切不可止藥。用單劑。日夜二服。止藥
病仍按證加藥。稍為酌減。熱初退時，切忌食凍粥。熱粥
忌食各物。見若外熱減而內熱不減，熱在胸。兩乳對熱
上補原起條。毒入包絡，必神昏謔語。加清營湯。日夜三服。元參、心麥

顛狂危極
矣非大劑
急服斷不
能挽貧難
備藥可除
羚羊三味
加黃芩麥
冬各伍錢
下有治案
可查

冬不去

各叁錢、丹竹葉心

如無用笏竹葉心亦可

羚羊角犀角各

貳錢、蓮子心伍分

如無不用

是也、並加西藏紅花錢半、日夜

連三服、以退爲度、熱退未清、閒有譫語、仍日夜二服、加

藥酌減、貧難備藥、可加竹葉心生燈草紫草茸各叁錢、

或加蘇木叁錢、亦可服法照上、若見顛狂△△雙劑合服、加

重白虎並竹葉心、羚羊角犀角、西藏紅花各叁錢、照上

服法、顛者捉住灌藥、牙關緊者、撬開灌藥、皆要扶起、牽

仰其首、用錫壺入藥、灌之、自易、病稍退後、要接服藥、若

服藥卽吐、熱毒攻胃、取生丹竹茹叁錢、如無卽用笏竹濕鹽輕

無汗宜加
紫背浮萍
參錢
若貧而無
資不能備
羚羊犀角
西藏紅花
等藥者可
改用竹葉
心生燈草
紫草茸蘇
木以代之

搓洗煎先服服藥不吐或用薑汁點眼角並擦天柱骨
亦可熱在膈胸下熱毒入營舌絳而乾反不渴加清營
湯犀角元參麥冬銀花各叁錢丹參貳錢合本方連翹
生地是也並加西藏紅花錢半日夜連三服未愈再照
服血從上逆見衄咯等證加犀角地黃湯犀角丹皮各
叁錢本方生地改壹兩赤芍如舊是也並加西藏紅花
錢半日夜連三服未愈照再服見癩加化癩湯即白虎
湯見上加元參叁錢犀角貳錢是也見疹加銀翹散銀花
牛蒡子各叁錢竹葉大青葉丹皮各貳錢合本方連翹

甘草是也。二證多見於大熱後，當大熱時見，宜日夜三服。微熱時見，日夜二服。若舌胎微黃，外微熱而內煩惱，煩悶坐臥不安也，加元參、沙參、枝子、黃芩各叁錢，或並加

淡豆豉貳錢，日夜三服，皆以愈爲度。以上皆二三日內

上焦證也。若敢按證加藥，按時服藥，服藥已多，熱毒必

解，其痰或從經絡散，或從咳嗽出，或從二便下，其病必

輕。縱核未消，將原方加減接服。加減法在本條之下，便可收功。過

此傳入中焦，有體壯毒盛而傳者，有誤服忌藥助毒致

盛而傳者，有改輕改緩積毒致盛而傳者，此時猶不按

證加重急追多服必無望矣其證核愈腫大面目紅赤
舌胎老黃午後熱甚若兼見渴強壯者加重白虎湯見
脈浮而促加減味竹葉石膏湯竹葉伍錢石膏捌錢麥
冬陸錢本方甘草改叁錢是也二證能加羚羊角犀角
西藏紅花各錢半更好或加枝子黃芩各叁錢亦好皆
宜日夜連三服未愈再照服以熱退爲度熱退未清忽
惡寒旋大熱是謂戰汗汗透熱解若人虛汗出未透致
熱未清宜加增液湯以助其液汗出自透元參壹兩麥
冬與本方生地各捌錢是也日夜二服餘熱未退小便

此譖語由
小便閉故
以通小便
爲主兼治
心脈

此譖語由
大便結故
以治大便
爲主兼治
心脈

重下之證
有陀村治

閉而譖語、加車前木通各貳錢、羚羊角犀角各錢半、貧

者加車前木通淡竹葉丹竹葉心各貳錢、日夜二服、以

小便利、熱退清爲度、熱退清閒有譖語、亦無妨矣、加淡

竹葉、竹葉心各錢半、每日一服、數服可愈也、甚而大熱、

大渴、舌黑起刺、腹脹腹痛、脹痛不必太甚、微有脹痛即是大便結而譖

語、熱結旁流、純流稀汁、絕無糞渣體厥、手足冷、脈厥而無六證見一

皆宜下、此時危在旦夕、宜急不宜緩、亦宜重不宜輕、故

人屬強壯、脈沈數有力、或沈小而實、宜用雙劑、加大承

氣湯、少柒錢樸硝、少叁錢枳實、多壹兩合本方、川樸各貳

王瓜福州
呼為菜瓜
泉州呼香瓜

錢是也能並加羚羊角西藏紅花各貳錢更好一服不
 下不妨雙劑照加再服以下為度此係屢試必重用方
 效故特改重重用未見有直瀉者不過大便稍利耳亦
 並未見有連來二次者如慮多瀉可備老鹹王瓜皮粥
 以待再瀉食之可止下後熱仍不退痛脹結流四證見
 一餘毒未清仍宜用下藥用單劑加大黃伍錢樸硝貳錢
 樸錢半接服若下熱必退矣下後仍有微熱間有譫語加
 羚羊犀角西藏紅花各壹錢日夜二服以熱清為度貧
 者可加淡竹葉竹葉心各貳錢無熱仍有譫語本方柴

葛減半、加元參、麥冬各貳錢、淡竹葉、竹葉心各壹錢、日
夜二服可矣。若大熱、大渴、兼見痛脹、結流、四證之一、人
壯脈實、不妨重加白虎、承氣、同服藥、用雙劑、以下爲度、
此表裏雙解法、富貴之家、懼石膏、大黃之多、可加羚羊
犀角、西藏紅花各叁錢、熊膽壹分半、竹葉心貳錢、藥用
雙劑、連二服、如仍熱、不退、便不下、可並加石膏、大黃各
伍錢、以下爲度、以上皆六日以前、中焦證也、若至七日、
則傳下焦、其證見上證治條治法兼滋陰、本方加元參、陸錢、若
前失治、仍熱、渴不退、人屬強壯、可重加白虎湯、見日夜

三服以熱退爲度。若見痛脹結流等證，人屬強壯，可重

加大承氣湯。

見上

一二服以下爲度。仍有微熱，獨見燥結，

可加增液湯以潤之。

方見上

日夜二服仍不下，可加小承

氣湯。大黃伍錢，川樸枳實各壹錢，是也。一服不下，不妨

再服。以下爲度。若口燥舌乾，齒黑唇烈，不甚熱渴，脈見

虛大，本方除柴葛，加一甲復脈湯。本方生地改用大乾

生地，陸錢，甘草改用炙草，陸錢，赤芍改用白芍，陸錢，餘

藥照舊。並加麥冬，不去心，伍錢，阿膠，芝麻仁，各叁錢，是

也。日夜二服，液仍不復，可並加調胃承氣湯以和之。大

黃參錢、樸硝伍錢、合本方甘草貳錢是也。日夜二服，以液生爲度。若無別證，惟核未消，餘時不熱，獨見子午潮熱。本方除柴葛，改用大乾生地，各藥照舊，加元參伍錢，日夜二服，約三四服，熱可清矣。潮熱譫語，並加竹葉心十枝爲引。以上皆下焦證也。若夫直中，直中者初起之證，初起大熱大渴，上焦二三日即見痛脹結流，中焦舌色金黃，痰涎壅甚，下焦等證，此三焦俱急也。人壯脈實，藥用雙劑，重加白虎承氣，二方小陷胸湯，半夏栝蒌根各參錢，黃連貳錢是也。半夏宜減半，日夜連二服，以病

忌用艾火
并忌服參

退爲度能加犀角羚羊角西藏紅花各叁錢更好凡白
虎承氣同用卽取石膏知母大黃樸硝可也原方不必
用全若疫盛行時忽手足抽搐不省人事面目周身皆
赤此鼠疫之急證非風非脫切忌艾火與參急用大鍼
刺兩手足拗處約半分深撚出毒血其人必醒或用生
薑拾餘兩搗爛手巾包裹蘸熱酒周身重擦自上而下
亦醒或拈痧或刮痧亦可醒醒後卽照原方連服二三
劑若見結核發熱照上法治老弱幼小急追祇用單劑
日夜惟二服加石膏大黃減半所加各藥小兒皆宜減

孕婦去桃
紅加王芩
桑寄生
熱久必墜
胎故宜急
服

半五六歲者一劑同煎分二次服重危之證一劑作一服幼小不能服藥用鍼刺結核三四刺以如意油調藥末下方見日夜頻塗十餘次亦可愈但藥末要各藥等分方效婦女同治惟孕婦加黃芩桑寄生各叁錢以安胎初起卽宜急服熱甚尤宜急追熱久必墜胎也若疑桃仁紅花墜胎可改用紫草茸紫背天葵各叁錢惟宜下者除樸硝諸證皆除惟核未消仍宜服藥瘀去未盡必成瘡也原方除柴葛改用大乾生地陸錢甘草改用炙草與當歸俱加倍其餘減半加元參伍錢氣虛可加生

芪貳叁錢每日一服三四服核必漸消如消未盡當歸
肆錢大乾生地元參各陸錢翹芍桃紅減三分之二生
芪肆錢川樸伍分炙草叁錢再數服或消散或破流黃
水愈矣初愈改用原方實滋陰去瘀善後之良方也人
雖虛弱切忌溫補蓋熱證傷陰初愈古法惟滋陰戒溫
補况結核未消卽熱毒未清溫補助熱其毒必發此時
體虛再病必無救矣惟質素虛寒偶感熱毒調治旣清
復回本質證見虛寒然後用補亦宜陰陽兩補勿遽溫
補峻補貽害也病時熱結旁流初愈昏昏迷睡手足微

冷核消後微有浮腫愈後六七日不大便詳見補原條起論證皆

宜小心體認切勿倉皇誤事

愈後六七日不大便用六成湯

當歸錢半 生地伍錢 白芍壹錢 天冬壹錢 麥冬壹錢 元

參伍錢 二服大便自易

愈後手足微有浮腫用補血湯

生芪捌錢 當歸肆錢 原方芪壹兩歸貳錢改用較相配

是證除十分老弱難救外餘皆可救惟誤藥誤時與不

小心調養者較難措手要先移病者置通風處為要蓋

惠郡初染疫時而患病家已無主意醫生又不敢用此重劑加以旁人浮言以此自悞者十居其七可不痛哉

此證不怕風正宜借風吹散其熱毒耳

是方桃仁紅花多用石膏大黃復多用殊駭人耳目試思此證甚驟遲疑輕用藥不勝病必致貽誤况此係屢

試屢驗傳之已廣慎勿聽旁人浮言致受自己實禍

以上諸法俱從屢次試驗得來證以強壯者為多故於

人屬強壯病盛熱毒家復有餘者每於重危之證必加

羚羊角犀角西藏紅花取其見效較捷耳無如人情多

儉富者聞而退縮貧者更可知矣茲為推廣分別熱盛

毒盛兩途隨證加藥亦足以治病如初起係熱盛之證

加石膏知母淡竹葉或雷公根地膽頭白茅根之類便
可以清熱如兼有毒盛之證加金銀花牛蒡子人中黃
之類便可以解毒若熱毒入心包也羚羊花雖屬緊要
然加生竹葉心生燈心黃芩梔子麥冬蓮子心元參心
之類便可除心包之熱毒若熱毒入裏也加大黃樸硝
枳殼以瀉之便可去腸腹之熱毒如此則貧者亦費無
幾矣老弱幼亦可類推酌減惟要照方按法急服多追
方可見效若改輕改緩固屬自誤卽每日一服一二服
卽以爲不效何異以杯水救車薪之火卽謂水不勝火

凡當疫氣
流行之際
無病之人
亦切戒食
煎炒熱滯
及房事
及房事

也方受冤而病者更受冤不誠可痛哉

復病治法

此證最易反覆有微熱未清而復有微熱方清而復以
伏邪未盡也謂之自復查所復何證照方按證加藥以
清餘邪自然獲愈有瘥後或因飽食而復或因厚味而
復以食物阻滯謂之食復輕則捐穀自愈重則消導方
痊加神糶山查麥芽以去滯自然獲愈有因梳洗沐浴
多言妄動而復謂之勞復脈和證輕靜養可愈脈虛證
重調補血氣方愈勿用寒削因服參桂而復急服萊豆

山查湯以解之、用清補滋潤藥以調之、以上各證、有核
無熱、照方酌減服、若因怒氣房勞而復、最爲費手、愈後
六七日見脹痛吐瀉等證、已非原病、宜按脈證調治、愈
後宜調補、尤宜靜養、節飲食、慎言語、謹起居、戒惱怒、寡
嗜慾也。

此方以桃紅爲君、而輔以歸、去瘀而通壅、翹芍爲臣、而
兼以地、清熱而解毒、樸甘爲佐使、疎氣而和藥、氣行則
血通、柴葛以解肌、退熱而拒邪、邪除則病愈、惟其對證
用藥、故能投無不效、他鄉用之、十愈八九、惟我陀村、著

效極多以用法有善不善之分尤在服藥有急與緩多與少之別也統計見效之處石城以陀村石嶺一方爲最城內安鋪及各鄉次之化州以新安一方爲最州城及各鄉次之廉府以城廂內外爲最山口北海及各鄉次之瓊府以海口爲最海田及府城次之雷府以平石爲最城月及各鄉又次之救人不知凡幾矣省垣西關衆善士將第二次存高郡聯經堂刻本刊發欽州李直刺將第三次存省垣聖經堂增本刊發海口衆善士將第四次存高郡聯經堂增本刊發印送已多流傳亦遠

方到之處、苟無蠱惑遲疑、卽敢急追多服、勿以小愈而中止、必以全愈爲收功、庶幾有濟耳、夫鼠疫死證也、此方生方也、以必死之證、而不敢一用可生之方、吾固惑矣、以必死之證、而不敢盡用可生之方、吾愈惑矣、有一未效而棄置者有數服稍效亦棄置者、衆曰氣數、吾亦曰氣數而已矣、夫復何言、

經驗塗核塗疔瘡方

凡小兒平時生癍白泡黃水瘡塗之均效

口米硃砂 伍錢

木鼈仁 捌錢

雄黃 伍錢

大黃 伍錢

冰片

貳錢

紫花地丁 伍錢

山茨菇 捌錢

共爲細末

小孩不能服藥用鮑游府塗法

調茶油頻塗、清茶亦可。瓊州鮑遊府用此方各味等分、調如意油頻塗甚效、須先四面輕鍼結核、切忌麝香、塗必暴腫、

又方木鼈仁研末、調醋頻塗、

經驗敷藥方

羊不挨麋三斂者佳土人種作園籬有微刺多白酒糟

如無用汁去皮取麋泉州呼為火巷刺待膏刺隔宿粥生鹽 三味同搗頻敷

又方天仙子研末調醋厚敷頻塗

又方木芙蓉花無花用葉指甲花無花用葉泉紅花家種馬

齒莧 同搥頻敷 以上各方均效多列以便隨取塗

敷皆以多次為妙 核塗敷均可疔瘡獨宜塗之

附陀村治鼠疫毒輕法 初起少而緩少大熱大渴痛痺等證照此條治

- 一專信方 免誤藥
- 二急服藥 免誤時
- 三廣施藥 免傳染

此證壞人甚速誤藥固死誤時亦死無錢服藥亦死我

村惟不忽人所忽絕無懷疑專信此方於疫初起時早

晚必慎視小兒詳詢婢僕見有微核身未熱者急用塗

藥一二日愈矣有核而頭微痛身微熱者急服塗兼施

亦一二日愈矣故於初起時已十愈八九間有重證按

證加藥照日夜連追法亦二三日愈矣卽有一二危證
照卽時連追法亦四五日愈矣貧賤復得所救亦無傳
染故患病雖以百數而貽誤曾無一人惟兼此三法之
善所以能收全功也是年見證幾二百施藥共錢七十
餘千卒能保全無一壞者實爲各處所無

增治鼠疫毒盛法

初起多而急多大熱大渴痛痺等證照此治法

二十一年陀村疫復作毒盛證重見核未熱服塗兼施
照方三四劑愈見核微熱日夜二服五六劑愈重證危
證照方加藥老弱用單劑連追法石膏大黃用參錢均

可強壯用雙劑連追法石膏大黃用柒錢壹兩兩餘外用布包藥渣溫熨周身或括痧拈痧或癰腫大放血更好有三四服熱漸退者有五六七服熱漸退者初稍誤時有十餘服熱漸退者熱退未清卽緩服藥反復遷延甚有三四十服然後痊愈者強壯毒盛合計石膏有服至柒捌兩者大黃有服至叁肆兩者羚羊犀角有服至肆伍兩者西藏紅花有服至貳叁兩者桃仁紅花有服至斤餘貳斤者強壯病重乘其元氣尙盛三四日卽服至十一二劑雖至危至重約十餘二十劑必愈熱清而

核亦消元氣少損愈後而人不弱若遲緩服藥多至誤事卽不誤事日久病深服藥必加熱清而核不消元氣漸損愈後而人亦弱初愈時必昏昏思睡數日若初起誤灸誤參必壯熱昏懵隨見譫語其死必速是年亦試

有救法急用雙劑加樸硝

參肆錢

大黃

柴錢壹兩

能加羚羊犀

角西藏紅花各

參貳錢

更好難取亦不必用瀉出瘀血涎

沫十可救七八若不急下百無一生

是年本鄉疫初起時一日見十餘證

醫者不知誤灸五人誤參四人次日皆死後鄰鄉有誤教以重下多得生者

最可憐者重危

之證少服未效卽行置手以致於死實可痛恨有氣服

藥，尙可救生，切勿置手。

石嶺一劉姓中疫甚危，手足腹背六處起核，氣喘如牛，熱甚渴。

甚一人告以雙劑連服法，每雙劑加石膏壹兩，知母伍錢，羚羊犀角、西藏紅花各貳錢，大罐共煎，隨渴隨飲，連進二服，已奄奄一息矣。三更後大下，毒瘀而甦，再用單劑熱清核潰而愈。是年見證幾三百。

施藥二百七十餘千，共死四十餘人，除誤醫與不服藥

二十餘人外，尙救九成有餘。合觀二年，上年鼠死少毒

輕，少服藥亦收全效。本年鼠死多毒重，倍服藥止救九

成。二則皆親經驗。

簡便服藥方

此方前刻分爲二，以二人所傳，茲合爲一，加入行血去

瘀解肌藥則合所傳而功乃全矣

萊豆

壹大杯

丹竹茹

叁錢

柴胡

貳錢

葛根

貳錢

生地

伍錢

紅花

伍陸朵

坡雪麻

一名地棉一名坡銀麻葉梗均可用泉州呼白田根又名遍地錦

蛤屎屖葉

一名紅毛糞箕督一名紅絲線別名見下

俱壹撮紅花紅蛤屎屖

葉

別名蛤督葉

有一已可如無加桃仁

捌錢打碎

紅花

伍錢要連服

多服以愈為度熱甚渴甚加下生藥三味核多加紅花俱各壹撮

生藥方

螺靨菜

一名錢鑿菜一名雷公根泉州名滿地坡

地膽頭

即龍膽草白

茅根

即絲茅根

右三味為君此外隨其地之所有如金銀花

土茯苓山鷄谷

竹葉

坡菊白蓮葉馬齒莧之類用大瓦

鍋熬水未病者先服清其源既病者急服解其毒雖平

日虛寒之人得病亦須服此然後可救

黃坡經驗方

紅蛤屎屙葉一裹

一名蛤君一名散血丹葉底微紅有毛底

青者非生藥攤有賣無葉用根

蛭蟻

一名偷泐婆一名臊甲泉州呼為夜遊又名家仙

七隻去頭

足腸

二味共杵爛用赤小豆煎滾水沖入去渣澄清飲

之輕者三四時瀉青綠屎即愈重者對時乃瀉亦愈此

方救人甚多

水東經驗方

蚌螺花

或呼北京蚌或呼抱心蓮人家花盆栽之

無花用葉

煎水飲之、不論其病爲癰核、爲黑癩、爲紅癩、爲疔瘡、爲
衄血、服之皆極效、亦有用生紫背天葵、生鐵樹葉煎水
服俱有效、

治疔瘡方 生白菊花連根、搥取自然汁一杯、滾酒兌

服、渣敷患處、留瘡頭不敷、蓋被出汗、其毒自散、無生者、

卽用乾白菊花肆兩、甘草肆錢、酒煎溫服、此方見驗方新編

治出癩方 紫背天葵、紫花地丁、金銀花、生枝

子、蒲公英、芫子、各叁錢淨水煎服、忌食粥飯米羹、全

愈身涼、方可食米氣、

此論甚是
遇危證而
稍涉遲疑
必無望矣

讀景嵩涯
尊生集者
更怕二味
意神農本
草經與各
名醫本草
注俱在請
詳閱之自

以上諸方生藥宜於貧家熟藥宜於富家均可備用故
列之以備采擇此證發時勢甚猛速必須急用猛劑不
必聽醫師評量斟酌揣脈論方延遲片刻遂致難救所
謂宋人議得定金兵已渡江也依此法治之庶幾百無
一失切勿遲疑自誤也自生藥方至此亦吳原本

釋疑說

此方鍼對病源用藥故能投無不效或者不察疑桃仁
紅花過多敗血實誤會李時珍本草綱目之贅說且誤
於景嵩涯之臆說耳綱目云桃仁補少而攻多紅花合

知尊生集
之誤人不
踐也

當歸能生血多服能行血夫曰補曰生曰行明謂去瘀
生新矣又云過服能使血下行不止此贅說也夫病除
藥止凡藥皆然况二味非常食之品何必慮其過服而
開後世之疑乎亦讀者之不善悟矣景嵩涯謂桃仁紅
花止可用壹貳錢亦未細讀本草經之故經云主癥瘕
徐靈胎於桃仁斷曰去舊而不傷新古方多用於傷後
產後可知二味爲去瘀非敗血也又疑當歸助血毒抑
知去瘀必須活血尤宜生血然用於涼血解毒劑中猶
不多用制方者未始無斟酌也又疑生地引邪入陰更

不可解考之本草經謂作湯可除煩熱積聚除痺本草
綱目謂能涼血滋陰時醫見有陰字遂疑其引邪入陰
夫陰血也熱毒中血管邪已在陰故內外煩熱四肢痺
痛用此正對證良藥而反疑其引邪入陰是認滋陰陰
字作表裏裏字解矣更爲可笑又疑羚羊角犀角爲至
寒抑知犀解百毒羚羊去惡血皆能清熱辟邪熱懵蚰咯
譫語顛狂等證用之尤宜況爲血肉之品清而不削也
石膏知母微寒無毒主燥熱除乾渴仲景白虎湯用以
止渴生津大黃樸硝苦寒無毒除寒熱去積聚仲景承

氣湯用以救陰存液蓋熱渴熱結等證陰枯則死非此
無以除熱而救陰故不得不權其重輕而用之求一生
於百死也然熱退瘀下則止亦不可過用高明者自能
辨別惟無知淺識肆口狂言誤已誤人實堪痛恨特爲
辨之以釋其疑

治案

初得此方
試皆效捷
意者爾時
證輕故易
見效歟抑
或天心仁

十七年春，縣城疫作，初閱得此方，贊與證合，爾時黃木
生爲予薙髮，卽求鈔用，予囑初起卽用，定易見功。及後
詢之，知伊家救此證者五人，皆一劑愈。其時林子幹在

愛予傳救
人故初試
為獨神歟
子不得而
知其故矣

座伊村初疫，鈔治三人，亦一劑愈。一工人持藥回家，延醫診視，醫者憤憤，教服半劑，竟斃。

十九年春，城鄉皆疫，予回橫山，泰興當早飯，李子碧林至，云有二婢大熱，譫語，腿核如卵，是早，長者已死，次者現危，求錄此方，照方加羚羊角、犀角各叁錢，初服，小便如血，熱減，核小，然腹滿便結，熱毒傳裏，復加枳實壹錢，樸硝貳錢，大黃伍錢，同渣煎服，是晚下二次，次早全愈。何氏婦，橫山人，與婢同病，其子聞婢已愈，亦來求方，以其貧，教以連服三劑之法，次日熱退，惟核未消，卽行止。

藥後成瘡潰爛

石城宏豐蘇杭店主人梅仿生，龍山人也。店內陸劉二司事患此證，服時醫藥瀕於危，壯熱譫語二日矣。予由橫山回城，仿生告以故，予因言此方之效，眾伴皆疑而置之。次早延醫不至，不得已用之。仿生見紅花枯索，加西藏紅花貲錢，一服病退，再服熱除核消，三服全愈。此加西藏紅花之始也。二司事愈後，恨時醫之誤，信此方之神，故刻陳情辨惑說傳之。陀村用合劑法傳至縣，李碧林亦寄信至縣，此方之效一時闕傳，信者遂眾焉。

族弟讓階之子在外染病回熱憎大渴痛痺自頂至踵起核卅餘顆危證也族人共酌曰如此危證非輕劑可挽遂合二劑爲一劑加石膏壹兩羚羊犀角各叁錢一服熱退渴止仍合劑服熱除核消單劑再服四五劑全愈可知危證責效一二劑必無望也

安鋪廩生李蔭棠之姪年十四歲患此證甚危熱憎顛狂牙關緊閉皆謂不救蔭棠聞此方之效卽催其父母照方加羚羊犀角西藏紅花各壹錢取四劑回搗而灌之吞下卽吐頻頻灌之始不吐連盡四劑病減再服數

疫證最忌
粥飯米粉

劑而愈，惟誤聽時醫之言，減去當歸，其核不消而潰。許旺宜興棧夥計也，年十五，骨氣正壯，初患此證，壯熱頭痛，無核，危證也。教以連服之法，二劑熱退，次早煮粥熱服，遂微熱，謔語，四肢痺痛，急加羚羊犀角各錢，西藏紅花壹錢，一服，病如故，兼見胸腹滿痛，急用下法，一服仍如故，並聞藥欲吐。一老醫曰：此熱毒攻胃也。教先服丹竹茹湯，然後服藥，果不吐，再照方加下藥一服，病稍退，仍加羚羊犀角各錢，連二服，並服生燈草心、雷公根、龍膽草、白茅根、白蓮葉等藥，兼菜豆湯，數次始愈。

黎涵智，白藤山人也。在石嶺貿易，每好談醫，得此方，常錄以治人。囑曰：切不可減少桃仁紅花，及已與妻患此證，反疑曰：我夫妻年六十餘矣，恐不能受此重藥，遂改輕桃仁紅花二劑，卽斃。妻亦垂危，人閱所開之方，始知改輕，卽照原方開服，其妻得不死。

補二十一年陀村治案

次兒啟基，年及壯，三月初二晚飲酒後，壯熱頭痛口渴，身痺，左腿腫連二核，照方一服，次三四日照方加西藏紅花錢半，二服未效，初四下午，予由城回，熱懵之甚急。

用雙劑連追加石膏壹兩知母伍錢羚羊西藏紅花各
資錢柱犀叁錢三服仍未效鷄鳴後譫語頻流尿汁毒
入臟矣初五早照前加樸硝資錢大黃叁錢連二服已
無尿汁頭痛亦順惟壯熱未退心胸煩燥大便轉閉初
六仍照前石膏知母減三分之一歸減半另加擘犀壹
錢生竹葉心生燈心各壹撮生枝子淡豆豉各叁錢大
黃加至伍錢連二服熱稍減便仍未通及晚照前大黃
加至柒錢一服便通熱始退譫語仍未盡除初七八九
用單劑加羚羊各資錢西藏紅花壹錢竹葉心燈心爲

引，每日二服，微熱，譫語始清，獨核不消，堅硬徑寸而痛，以後照方日一服，六七日堅硬已軟，小成瘡，以痛未止，仍日一服，又三四日始穿流黃水，用托裏透膿湯二服，瘡已成膿，而頸起微核，復照原方二服，核消，仍塗敷數日始愈，此證初熱邪在表，失在不重加白虎，迨已入臟，又失在輕用承氣，以致於甚，其核不散，又失在減輕當歸，誠以大熱不退時，惑於常說，慮當歸助血熱，大黃損元氣故耳，所幸誤用輕而不誤用藥，不致大誤，自後遇證，宜用石膏、大黃，人又強壯者，初用必柒錢，次用壹兩。

多於二三服見效。

一後生年十七，初熱渴痛痺，見核數處，依方二日三服，已熱槽矣。次用雙劑，加知母伍錢，石膏壹兩，羚羊摩犀，西藏紅花各叁錢，一服稍效。主人慮白虎大寒，羚羊太貴，用雙劑加西藏紅花貳錢二服，隨用單劑二服，甚至譫語奄奄一息，移至廳事，備棺將殮矣。家人遷避，留人看視，原方日一服。二日後有老婦來告曰：此子稍蘇，呼救能食米湯。予細詢之，知尙微熱，譫語並手擺舞，大便閉結，已形銷骨立矣。姑予二劑，加羚羊各貳錢，西藏紅

花壹錢，樸硝叁錢，大黃柒錢，連二服未通，已能食稀粥。一碗，再用雙劑，加羚羊、摩犀、西藏紅花各貳錢，樸硝肆錢，大黃壹兩，一服卽通，諸證皆減，惟核潰爛，調治廿餘日愈。此證雖誤時，幸無誤藥，卒能保全，然以遲疑致苦累已不少矣。

一少婦臟素寒，時服溫，初起壯熱頭痛，大渴，身痺，頸核焮紅，隨時加腫，急用雙劑連追，加知母伍錢，石膏兩半，至貳兩，羚羊、摩犀、西藏紅花各叁錢，日夕四服，腫已定，痛渴稍順，惟熱未退，以大便未通故也。次早仍用雙劑。

加知母肆錢石膏壹兩樸硝伍錢大黃壹兩羚羊摩犀
西藏紅花如故一服未通日中照前大黃加至兩貳便
通瘀下熱稍減晚仍照服以後用單劑加羚羊摩犀西
藏紅花各貳錢日夜二服五六服全愈此證加藥至重
追藥至急其愈亦至速

二十二年瓊府治案

黃聖徵年將五十海口會隆行股東也家瓊城以疫死
者已囚人伊始病避居海口延往診視其證稍熱渴腿
夾各一核足面一疔瘡毒甚而熱不甚也輕加石膏知

母並紫花地丁、囑日夜三服、並外塗、伊答云、敢二服亦聽之、次日畏石膏之寒、不得已加羚羊角、犀角、西藏紅花各壹錢、並紫花地丁、囑二服、是晚稍見譫語、加羚羊角三味各錢半、並地丁、竹葉心、囑二服、次早譫語已無、除竹葉心、照上加法、連服數日、皆囑二服、至六七日、瘡下熱清、而人弱矣、初愈、照初改原方法、囑每日二服、五六服、疔潰腐脫、核亦漸小、再照次改原方法、俱見上治法條加生芪叁錢、每日一服、四五服、始稍精神、核穿出黃水、疔瘡愈而足微腫、再照次改法、加芪、閒服補血湯、又數服

始愈愈後始知以家人阻止初二日止服劑半以後每日止一服噫以緩服而至久延倘非年將弱而熱未甚必悞事矣

海口潮行公成號楊子敬長孫十歲身熱無核右脈盛左瘦證也原方減三之二加竹葉銀花囑日二服伊日一服三服後兩腿見核加西藏紅花二服證見熱結旁流核愈大原方全劑加黃樸減半一服下後腹微痛又加黃樸酌減服後腹仍痛再加酌減一服病愈而核未消照改方三服核消無痕伊次子年二十餘歲熱渴痛

痺有汗無核危證也宜重加白虎主人懼寒減半日夜
三服病如故次日迫改加羚羊花各錢半三服仍如故
第三日三味加至貳錢二服是晚主人持別醫之方來
商予謂其方重用清解之藥無礙但無桃紅恐不中肯
耳二服如故稍見譫語第五日復求治加三味至貳錢
半是晚下毒瘀如煙膏但微熱而已第六日照第二日
方日夜二服復下瘀一次諸病皆除惟昏昏迷睡手足
微冷主人著急診其脈已見和緩知其爲困也著備稀
粥以待將晚醒稍精神復照一服第七日兩手臂始見

微核數粒以後照初改方日一服五六日不大便服六
成湯一服卽順以後照次改方間日一服數服愈
一婢微熱痛痺無核初輕加白虎二服再少加西藏紅
花二服愈

一工人微熱有核原方四五劑愈

海口貞記號有工人邱姓文昌人年廿餘雞鳴起病黎
明大熱渴痛痺有汗無核已不省人事矣爲至危證重
加白虎日夜三服次日熱稍退伊戚慮寒予笑謂仍宜
重用迫順其意用伍錢又三服第三早熱稍增始信前

言不誣用柴錢加犀角西藏紅花壹錢又三服即咳出
瘀血數塊而愈此以重用急追見效之速也

府城西門外下田村有黃姓夫婦齊來求治伊子細詢
其狀曰兒名亞就年十歲形瘠弱現已熱渴譫語周身
數十核予訝其多曰初腿夾二核身微熱第四日醫以
爲虛用花旗參貳錢遂致如此此加羚羊花證也伊謂
貧難辦此贈以眾備西藏紅花參錢初用全劑卽小兒
雙服法加元參心麥冬連心竹葉心各貳錢西藏紅花
捌分日夜二服病已減半繼用原方三之二加藥減四

之一二服病已十去八九惟雞鳴時微有熱渴譫語此潮熱陰虛也用初改原方法加重大乾地並元參伍錢二服病愈後知其足面一疔瘡用次改原方法加紫花地丁叁錢數服並外塗始痊其餘治效甚多難備錄

廉雷治案

二十一年四刻初成卽過瓊候委有孔姓來瓊交五十本帶回廉州分送二十二年二月孔姓復來瓊詢之知漢軍薛蓉裳孝廉歎賞此方廉城內外現有此證皆用此方敢照法者無不效及四月接孝廉三月十五寄瓊

索書之信云廉城自正月至三月染證二百餘人惟十餘人不敢服致誤刻下各鄉亦有此證來城取書已無以應特求多寄以便廣傳據此則廉之治效亦多也雷州遂溪平石村初得此方亦效雷廉亦皆有徵也此方救人無數實難盡錄姑錄其緣起與奇效及貽誤十餘則以備法戒耳
疫毒中氣分驗方列後

呂祖治時疫肚痛吐瀉經驗方

初起卽宜急服

先見熱渴

茅山蒼朮

貳錢

藿香

貳錢

柴胡

貳錢

神糶

貳錢

澤瀉

貳

然後吐瀉
宜用此方
熱渴甚者
宜加白虎
湯方見上

錢
羌活

木通

舊清遠茶

舊茶葉

老蔥頭連根

貳個同煎

其證初起、微熱肚痛、上吐下瀉、家家傳染、乃爲疫證、壞
人甚速、或半日、或對時、蓋緣感受濕熱與不正之氣而
成、治法於初起時、卽急含服菩提丸貳個、隨服此方、證
輕者照方服、稍重者加半劑服、至重者雙劑合服、俱一
二服效、初起及愈時、皆宜戒食米氣厚味、卽食亦不宜
遽飽、所謂至重、就初起言、若誤時病甚、宜服後回陽湯、

附列呂祖師乩授菩提丸方

紫蘇 甘草 扁豆炒 薄荷 藿香 陳皮 半夏

砂仁 麥芽 蒼朮 山查 枳壳 神糶炒 香附

厚樸 黃芩 茯苓 以上各捌兩、於五月初五

日、共研細末、用鮮荷葉煮濃汁拌透、將藥晒乾、煉蜜

爲丸、每個重叁錢、大人每服一丸、小兒半丸、此藥每

料價值二元半、可製丸四百五十餘個、各證治法

列後、一瘟疫時證、發熱惡寒、頭痛身痛、胸腹脹滿、

用薑湯調服、一暑證、肚痛瀉、口渴發熱、小便不利、

大便下血、用藿香壹錢煎水服、一霍亂吐瀉、擾腸

膳丸後忌
羹食粥飯米

痧腹痛轉筋加胡椒柴粒菘豆肆拾玖粒共打碎煎湯調服。一瘧證寒熱往來用生薑汁和滾水沖服。一咳嗽多痰加百部伍分煎水入生薑汁調服。一紅白痢腹痛下墜加車前子煎湯調服。一傷食痞滿泄瀉用薑茶煎水調服。一感冒風寒或水土不服山嵐瘴氣雜證用薑湯調服。孕婦忌服。

光緒七年方勇往欽堵禦軍中疫作到處傳染路過石城石嶺青平皆感是證次日石城死五人公局與縣署登卽捐錢施藥用菩提丸貳個與此方一劑投無不效。

飛送至石嶺青平用之皆效救二百餘人此方各處著效甚多凡感不正之氣吐瀉皆宜惟虛寒與病後吐瀉不可用

又醫林改錯救疫毒吐瀉轉筋二方

轉筋即抽筋

解毒活血湯

此方原用以治疫毒吐瀉轉筋證予見其論與鼠疫結核證合移用極效但疫毒吐瀉未曾經用如用呂祖師方不合即用此方想制方者未嘗無所見也故依原方錄之

先見痲疹
然後吐瀉
宜用此方

連翹

貳錢

葛根

貳錢

柴胡

參錢

當歸

參錢

生地

伍錢

赤

芍參錢

桃仁

捌錢

紅花

伍錢

枳壳

壹錢

甘草

貳錢

此方用於初吐瀉時若見汗多肢冷眼塌筋抽雖有舌
乾口燥大渴飲冷等證非熱毒也蓋吐瀉已久熱毒必
清斯時元陽已衰真陰將竭陽衰故有冷塌抽筋等證
陰竭故有乾燥渴等證實與大熱大渴之爲熱異也此
時非急救陽以維陰則陰陽俱絕矣宜急用回陽湯方

照原
本錄

回陽湯

黨參

捌錢

附子

捌錢

乾薑

肆錢

白朮

肆錢

甘草

叁錢

桃

仁

貳錢

紅花

貳錢

有力者宜改黨參用麗參叁錢服後

手足暖回諸證皆止不可多服宜按脈治

語云瘟疫不入忠孝之門積善之家誠以正氣可以驅邪和氣亦可以辟邪也忠孝勵於己積善及於人其道多端尤莫善於時證之施藥蓋一施藥而三善備焉施藥則善行積善積而吉祥集可免災患矣施藥則所救多救多則疫氣滅可免傳染矣且施藥並可資歷練歷練則膽識生遇證可免旁人之蠱惑自

己之遲疑矣。爲人實以爲己，積善亦以全吾忠孝之道而已矣。

治鼠疫法，皆予數年來詳考博訪，細體而得，故其中利弊言之獨詳。親用救人，不止千矣。傳用救人，不止萬矣。無如方初到處，人多疑之。夫已疑此方，必誤用別方。所願諸君於一誤之後，不可再誤。卽宜及早回頭，急依方照法以治之。所列稍輕稍重之證，可救十全。至重至危之證，可救七八。若醫者任意更改，以逞神奇，病家率意煎調，以至焦灼，或中道改圖，或半途卽止，仍係自誤。毋

謂言之不早也

新采驗方

南海羅蒲溪所傳

生紫背浮萍去根取葉莖參肆兩絞汁沖開水服煎服亦可

送書感應說

戊戌春省中患疫每日死者以數百計里中遷避爲之一空余家母年已八十餘矣眷口四十餘人其時城廂內外均染是證無地可遷數日閒老母及兄弟子姪妻妾婢女家丁僕婦一時患病者廿餘人余焦心疾首無以爲計急取此方與衆服之并詣禹山關帝君前禱

告願印送此書五千卷并施藥五千劑印藥方一萬張
越宿老母各人次第而愈豈余一念善心之感動所至
耶戊戌初夏花翎候選道南海徐履端誌

以上羅廣文
原本

閩粵治案

丁酉夏五漢珍家兄縮符惠安其時適該縣城鄉患疫
醫生處方皆不對證死者日以十數計余聞之戚戚焉
後以加減解毒活血湯方刊刷廣送遍貼城鄉并製藥
施送邑人賴活者甚衆己亥四月余郡惠州城亦染是
證當鼠疫初作時余有聘媳何氏年十齡陡患此證余

深知此方之驗、商之瑞雲親家、擬以此方與服之、醫者

疑桃仁紅花過重、狃於偏執、避而不用、又悞抽搐爲內

風、

惠安有女醫者專醫小兒科故悞爲風而灸以艾

灸之以艾、越宿已不治矣、

六月閒、有堂弟年廿五、自外鄉染病、回昏悶痛痺、起核

數顆、屢投清涼劑、未能見效、越二日、熱憎顛狂、牙關緊

閉、僉謂不救、余以此方加劑、合煎、搗而灌之、連服八劑、

而愈、蓋吾郡初染、是證時、病家多悞聽時醫之言、以此

方過重而不敢用、以至病者十不救二、纔四閱月、計歿

者千一百有奇、遂至醫生束手、病者委命而已、傷心慘

目何以爲情、余遂集同人捐資備藥、施送後之病者、服此輒痊、於是郡縣各鄉、始堅信此方之效驗、卽醫生亦佩服而不疑矣、藉此方活者二三千人、近年廣東省城、香港、澳門各處、服此方得活者亦億萬衆、余去臘遊幕南安、適館時、正值城鄉患疫、余鈔錄各方、遍貼城鄉、聞服者甚效、今秋于役溪尾、有鄰居六歲小孩、染疫起核、余贈以此方、兩服卽愈、足見此方之效、又奚止吾粵一省已哉、庚子秋、李雨山甫誌。

粵省鼠疫之患、起自己丑春、傳染流行、遍延各府、迄今

十有二年矣，藉此方活者億萬衆，茲將驗方列表於左。

治鼠疫經驗各方

鼠疫毒核消毒散

連翹

壹兩

薄荷

叁錢

馬勃

肆錢

牛

芎藭

陸錢

芥穗

叁錢

殭蠶

伍錢

板藍根

伍錢

卽青黛

元參

壹兩

苦桔梗

壹兩

銀花

壹兩

甘草

伍錢

共爲粗末

每

服陸錢，病重者捌錢，用乾蘆根肆錢。

卽蘆荻竹之根

先煎水

碗半，以蘆根水熬藥末，叁兩滾去渣服。輕者一日三

二服，重者一時許一服。

己亥夏惠郡患疫，江密葺

農部製此散施送，賴活者甚衆，如倉猝不及研末，則

敷毒核藥
方詳下文

用下方煎服亦可另敷毒核藥方列下

消毒飲方

連翹

肆錢

薄荷

柒分

馬勃

錢半

牛蒡子

貳錢

伍分芥穗

壹錢

殭蠶

壹錢

板藍根

壹錢

元參

肆錢

銀花

肆錢

肆錢

甘草

壹錢

苦梗

肆錢

用乾蘆根

肆錢

熬水

取水

煎藥照上服法以常服急服為貴如有生蘆根更妙

宜用捌錢

經驗疫證丸

製蒼朮

貳兩

山查肉

貳兩

川麝香

壹錢

炒元胡索

壹兩

正桔紅

壹兩

真蟬蘇

肆錢

青皮

肆兩

明雄黃精

肆錢

膽南星

貳錢

木香

捌錢

大硃砂

伍錢

熊胆或用
三分亦可

加正建神糶捌兩共研細末爲糊加入丹末爲丸如
黃豆大大人每服叁丸小兒壹丸開水送下如無入
丹末將此丸研叁兩餅爲末作引亦可孕婦最忌服
應驗疫證方 黃花地丁 叁錢 紫貝天葵 貳錢 甘草節

貳錢

荆芥 貳錢

大黃 貳錢

穿山甲 貳錢

牙皂 錢半

土

銀花 叁錢

野菊花 叁錢

西藏紅花 陸分

熊膽 陸分

者不用

亦可淨煎服如有起毒核現紅色者即將黃花地丁紫
貝天葵每味加多貳錢銀花野菊每味加多柒錢同

煎服

呂祖乩示疫證方

銀花

壹錢伍分

花粉

壹錢

青黛

壹錢伍分

淡

竹葉

壹錢

生地

叁錢

牛蒡子

貳錢

乾葛

貳錢

知母

壹錢

伍分 虻蟻草

叁錢

粉丹皮

貳錢

生石膏

叁錢

蜈蚣

壹錢

足同煎取其以毒攻毒切勿除去

此證初起係烏痧成標痲其毒重

者爲標蛇有作嘔或扇黃尿水心胸作悶在其胸前

以手一插有數核標起者卽是此證服此方後尙有

紅黑疔出者則照方除去蜈蚣加摩犀角羚羊角各

壹錢一二劑卽愈

岳武穆王時疫活命丸 專治時疫毛疔癰痧標痲標

蛇猪毛癩等證

川連 伍錢

錦紋大黃 肆錢

黃芩 伍

錢

正牛黃 壹錢

正珍珠末 伍分

琥珀 肆錢

冰片 叁錢

雄黃 伍錢

黃柏 伍錢

連翹 伍錢

甘草 伍錢

樸硝 肆錢

巴豆 壹錢

生地 肆錢

牛蒡子 伍錢

銀花 肆錢

神砂 貳

錢十七味共研細末蜜爲丸每重壹錢伍分淡鹽湯

送下輕者服一丸重者二三丸取其瀉出熱毒卽愈

如倉卒不能研末則照方取十分之二藥煎服亦可

孕婦忌服

關聖

文君乩示疫方

巴豆霜 壹錢

牛蒡子 貳錢

淡枯

芩參錢 川連貳錢 舊枳壳錢半 生地貳錢 連翹參錢

川樸壹錢 麥冬壹錢伍分 白芍肆錢 甘草壹錢 淨煎

後下 不去心

服此方專治痧疹癩猪毛癩無論有無毒核服之能
清解五臟熱毒如起毒核則用黃芩川連黃栢各
伍錢大梅片壹分共爲末加熊膽調搽之忌服寒涼
疏散之藥則難救矣或用龍眼肉包熊膽以紫草
茸煎湯送下亦愈愈後永戒食牛犬
經驗鼠疫方 初起發熱譫語過一日則舌苦焦黃口
渴六脈數大因其先有內熱再感天令火而發每起

則傳裏內攻陰分故以生地鼈甲先實其陰再以連

翹銀花苦瓜乾洩裏熱又以竹茹黃芩解其外熱白

芍平其肝氣每服三二劑必愈生地捌錢竹茹參錢

鼈甲壹兩連翹貳錢白芍貳錢銀花參錢黃芩參錢

苦瓜乾參錢淨煎服

治疫奇方 金銀花參錢生甘草貳錢小粒烏豆伍錢
微炒

勿焦白礬貳錢淨黃土伍錢右藥五味用飯碗量兩碗

半水煎至壹碗水臨睡時溫服次早天亮計合六箇

時辰必汗出即愈如不愈次日臨卧時照服一劑無

加黑枝參
錢同研末

不見效此方係仙人傳授王相國救活多人無論已

傳經未傳經陰證陽證皆愈或用蜜爲小丸每服參

錢亦效

鼠疫毒核散

生芪

壹兩

半夏

貳錢

杭菊

貳錢

車前

貳

錢歸尾

伍錢

明硃砂

參錢

甘草

伍錢

連翹

伍錢

防風

貳錢蒼朮

壹兩

生地

伍錢

白芍

貳錢

木通

貳錢

花粉

參錢

黑參

參錢

加熊膽

貳錢

共研細末

每服參錢開

水沖服

另加熊膽貳分沖服更妙

并塗毒核

如倉卒不及研末則酌量減輕煎服亦可

經驗時疫毒核方

原菱菜

又名香菜泉州呼爲筵綏菜

煎湯服連

服參肆次即愈

治疫核癩疹方

蛇癩角

形如犀角出安南國此獸喜食毒蛇香港藥舖有可購

磨水飲極為效驗

應驗疫核散

存濟堂普濟消毒散每樽價銀壹角鋪

在廣東省城惠愛街八約前年廣東善後局製散十

萬樽分送各縣存活者以數萬計

治疫雷擊散

牙皂

參錢伍分

細辛

參錢伍分

明雄

貳錢伍分

硃砂

貳錢

伍分 霍香 參錢

枯礬

錢半

白芷

錢半

防風

貳錢

木香

貳錢

錢 貫眾 貳錢

陳皮

貳錢

桔梗

貳錢

法夏

貳錢

薄荷

貳錢

錢甘草 貳錢

共研細末，貯瓷餅中，勿洩氣。凡遇疫證，忽然肚痛，手足厥逆，面色青黑，上吐下瀉，霍亂等證，及吐瀉不出，乾霍亂急，取末壹貳分，先吹入鼻內，再用末壹貳錢，沖陰陽水服，卽愈。凡遇此等證，宜用紅紙捲成紙條，蘸燈油點著，照病人身，如身上有起紅點者，卽是痧痧，不可服此散，須用銀鍼挑破出血，另用蕎麥伍錢煎服。孕婦忌服。

疫證霍亂兩腿轉筋方 木瓜陸錢煎服，外用大蒜頭

搗爛，敷兩足心。

鼠疫痧證方 生白礬貳錢 陰陽水沖服，卽愈，須周身

刮痧，以刮透爲止。

鼠疫驗方 大青參錢 青黛貳錢 黃芩參錢 花粉參錢

人中黃參錢 紫草茸參錢 連翹參錢 忍冬參錢 枝子

貳錢 淨煎服，此方屢驗，活人多矣。

鼠疫標蛇方 近年有新起標蛇之證，最易傷人，倘過

一二日則難救也，如悞作瘡科治，必至不能救，初起

身似寒熱，或亂言亂語，或生在頭上及四肢，見有些

微痛起一團肉腫者是也，急用假菊花又名野菊花 俗名路邊菊

春酒擦之，以止標病。再服後開之方，先食正熊膽。

分然後服藥。青天葵參錢野菊花參錢黃柏錢半

蒲公英貳錢川連錢半黃芩錢半甘草貳錢尖檳參

分淨煎服。將標蛇用銀鍼挑破，流出毒血，即愈。

治疫方 黃沙糖壹杯，生薑自然汁壹杯，用白滾水壹

大杯調勻，乘熱急服，蓋被出汗，即愈。又方：蒼朮、良

薑、枯礬各等分，為末，每用壹錢，以蔥白貳大個搗勻，

塗手心，男左女右，將手掩肚臍，手須窩起，勿使藥着

臍。又以一手兜住外腎前陰，女人亦如之。急煎菜豆

湯壹碗飲之、點線香半柱、久可得汗、如無汗、再飲菜
豆湯催之、汗出即愈、大頭瘟證、照法治之、即愈、

辟疫散

專治傷寒、傷風、風熱、斑疹等證、并治硃痧證、

又名心經疔

其證初起、脈散、牙緊、手足麻木、發輒、閉目不

語、喉腫、心疼、心慌、急視、前後心有紅點、速用鍼刺破
出血、如內有紅絲、即挑出、可保無患、此證傳染甚急、

頃刻不救、用製蒼朮

伍錢

桔梗

參錢

神糶

貳錢

滑石

貳錢

熟大黃

貳錢

明雄

貳錢

厚樸

生甘草

貳錢

法半夏

貳錢

川芎

貳錢

藿香

貳錢

羌活

壹錢

白芷

壹錢

柴胡

壹錢

防風

壹錢

荊芥

壹錢

細辛

壹錢

前胡

壹錢

枳壳

壹錢

薄荷

壹錢

陳皮

壹錢

皂角

壹錢

除

壹錢

石菖蒲

壹錢

公丁香

壹錢

廣木香

壹錢

去筋子

壹錢

草果

壹錢

香薷

壹錢

共研極細末

磁餅收貯

勿令洩氣

每遇患者

先用貳叁分吹入鼻內

錢滾薑湯

沖服

如體虛者

加黨參

肆錢

煎湯沖服

小

兒每服壹錢

病重者

三服即愈

除疫救苦丹

治一切時疫傷寒感冒

無論已傳經未

傳經均愈

麻黃

壹兩

乾薑

壹兩

明天麻

壹兩

貳錢

乾薑

壹兩

明天麻

壹兩

萊菔豆

壹兩

壹兩

壹兩

壹兩

貳錢宜 研粉 松蘿茶 壹兩 明硃砂 捌錢 生甘草 捌錢 明雄

黃 捌錢 生大黃 貳兩 共研末蜜為丸如彈子大 大人

壹丸 小兒半丸 涼水調服 出汗即愈 重者連進二服

服後未汗 切忌食熱湯熱物 汗後不忌 此丹寒熱并

用功極神效 百試百愈

呂祖 訖示辟瘟丹 雄黃 肆兩 川連 貳兩 藿香 叁兩 貫

眾 貳兩 白芷 貳兩 沈香 捌錢 羌活 兩半 殭蠶 貳兩 降

香 壹兩 獨活 兩半 鉤藤 肆兩 清菊 壹兩 共研細末 每

服叁錢 小兒貳錢 溫水調服 或用作香粉燒可解

疫氣

治陰證疫核方

初起面青心悶譫語者，決爲陰證。若服苦寒藥，則不治矣。宜用升麻、歸身、鼈甲、甘草各等分，加西藏紅花、熊膽等藥煎服之。如重證，升麻、鼈甲有加，至捌錢壹兩不等，宜酌用之。

治鼠疫毒核法

初起身熱面紅口渴，心悶譫語者，決

此方簡便效驗異常

是此證。其毒核有起在頭面四肢及身上，初起如豆

大過兩刻，則如龍眼核。大起在皮內，以手按之，應手

而動。急用仙人掌半個，又名神仙掌泉，州呼仙巴掌。切碎煎水服。

敷核要頻
換藥不歇

之如見效則再服又以仙人掌春爛敷毒核留頂上
一小孔以出毒氣有身上起核而無身熱口渴等證
者其毒氣較輕有先起核而後身熱者病亦較輕若
先發熱譫語而後起核者病較重核起在頭面及上
焦要穴處則較重起在四肢及下焦與不關穴道者
則較輕亟宜先敷藥藥熱則換藥其見效自速也

或服菊花飲亦可

方見下文
羊毛疔內

敷毒核方

生蒲公英

貳錢

生柏樹葉

貳錢

生水浮萍

貳錢

天仙子

壹錢

雄黃

壹錢

冰片

伍分

共春爛和蜜

糖敷之，抑或用大土煙膏和藥敷患處亦可。或用

梅花點舌丹調煙膏敷之。或用半邊鐘即如鳳尾草半邊樣

子春爛敷之。或用獨腳蓮搗爛敷之。或用七葉

一枝花根磨水塗之。或用竹樹米和白紙葉搗爛

塗之。竹樹米泉州呼竹垂麥或單用白紙葉敷之亦可。或用水芙蓉葉有

花更佳，和生鹽舂成膏，加大土煙膏為心敷之。每壹

點鐘換藥兩次。或用連鬚蔥頭春爛，加雄黃末冰

片調敷。或將毒核用銀鍼挑破，刮出毒血，用生蟾

蜍一隻活剖開肚，連五臟敷在核上，用布輕輕紮住。

日換三數次，俟流出毒水即愈。蟾蜍眼紅腹無八字紋者勿用，又名癩蝦。

蝮

或先刮痧，周身刮透，再用銀鍼挑破毒核，流出

血水，後用布蘸童便，頻頻擦之。或用歸尾、枯礬、雄

黃、牡礪、紅花生者更佳、連鬚蔥頭、六味配合搗爛敷之。

或用臭草、雄黃末、仙人掌、蜜糖共搗爛敷之。或用

雄黃末、硃砂、烏梅各數文，加人乳好燒酒少許，共搗

爛敷之。或用紫蘇葉生者更佳、紅糖同搗爛敷之。或

用蛇頂骨壹粒，貼在核上，俟兩點鐘久，用人乳半杯

將蛇頂骨用竹筴夾起，浸在乳內，兩點鐘久，取出再

貼之類浸頻貼以核消爲度

或用銀杏仁搗爛和

生鴉片膏塗貼亦效

急救轉筋鍼法

凡患霍亂吐瀉轉筋及猝然昏倒不

省人事者速卽細看兩足上至腿下至腳底周圍看
遍皮閒有紅紫青筋如小蚰蚱螞蟻樣粗細不等橫
直屈曲無定與人身脈絡不相連屬較人身脈絡稍
爲明亮以手措之儼同蠕動或以冷水拍之亦然如
見此筋或數處或數十處便是此證速用銀鍼向其
筋上平中逐一刺之鍼入半分卽有血出輕者色淡

重者紫最重者如墨水刺後其如蚰蚩者卽縮攏一團又有受病久而未發其筋隱入肉內而皮間只見數點青黑之影鍼刺必須一兩分深方能出血血出任其直流不可揩動蓋從上揩則吐從下揩則瀉俟毒血盡以生薑蘸桐油搽之其血卽止隨後以生薑叁片體虛者貳片泡水服之稍爲溫煖靜坐一刻遍身俱有微汗卽安務要避風忌葷腥生冷等物此證每因疫氣流行傳染甚多以此法治立試立效切勿挨延悞事

救疫證刮痧法 凡遇此等急證先用清水拔喉攪并

兩旁跳筋、拔出紅紫之痧、及周身遍刮痧、順刮方可、
勿憐其痛而忽之、以悞大事、要刮至病人知痛大叫
哭、使其肝氣鬆而病可救矣、

急救疫證熨法 凡遇霍亂急證、速用生鹽半斤炒熱、

用布分作兩包、患肚痛者將熱鹽輪流熨肚、患抽筋
者定必四肢抽搐、以熱鹽輪流熨兩手灣及兩腳灣、
并脈門、冷卽更換、以筋舒爲止、見效甚速、仍速服藥、
或用樟木子數枚打碎、和午時茶或藥茶餅煎濃、

溫服卽愈。或用獨腳柏樹葉搗爛開水沖泡用陰陽水調服以渣敷心胸處。

治疫證酒熨法 專治時疫傷寒或飯後氣惱心口脹滿填塞不舒急用上好燒酒燉熱將布兩塊蘸酒自胸向下擦抹布冷再換熱布輪流擦抹如此數次其氣自通而愈矣。

治鼠疫白泡子法 近來疫證傳染流行有人身上四肢陡起小白泡如黃豆大似被湯火傷處所起之泡子是也初起甚痛亦有身有寒熱急用冷水一盤加

此證最易
心畧患者
且急治之

而後止，隨卽用熊膽叁分調蜜糖服，服後再服下開

之藥方，一兩劑卽愈。服方：黃芩貳錢、黃柏壹錢

木通錢半、連翹貳錢、大生地貳錢、淨煎服。如有毒

核，則用歸尾、枯礬、雄黃、牡礪、紅花、蔥頭搗敷。

救猪毛癩法：用生雄雞仔一隻約十一二兩，生剖開，并雞

血雞毛煎湯，用京青布包好，照上方法擦之，已擦後

卽服後開兩藥方，分先後服之。以接連服之爲妙。先服方

天葵、蒲公英、地丁、銀花、甘菊共五味，約

共買二三十文。後服方：苦瓜乾、狗肝菜、鬼

羽箭 路兜菊

榕樹鬚共買三十文煎服

救疹痧癍等證法

用冷水拍病人兩臂作黑痧卽用

青茺葉鹼水在病人胸背擦出紅癍卽愈如口渴以

苦瓜乾煎水代茶飲生苦瓜水更佳

急救毛疔毛癍法

初起多昏悶脹痛

亦有不

最忌刀

割一二日必死須急看頭頂直到鼻梁下至心胸如

見有紅毛急爲拔去若見有紅子紅癍卽用鍼挑破

出去毒血用醋湯薰之并食熟煙筒油卽愈

製醋

湯法用好醋壹觔或貳觔入瓦鉢內取甄石燒極紅

透淬入醋內

或銅鐵木炭均可

扶住病人向鼻薰之用布圍

住勿令洩氣立刻能起死回生

或熟煙筒油敷四

圍亦可

凡實火證食煙油不知苦辣味虛火則不能用也虛火食之必吐其知味苦耳

或

用鮮雞蛋去黃用蛋清以少許入旁人手心在病人

胸前揉擦如見有毛出卽用薄薄棉花蓋住少刻毛

落棉上則又擦之有擦前心而毛竟入後心者須用

兩人合前後心兩處擦之照前用棉蓋住俟毛落下

又擦之以擦至毛盡爲止

時疫大熱證毛疔癩疹標蛇猪毛癩毒核方

此證初

起頭痛身熱沈重急宜刮痧多次戒食粥飯米氣

西秦艽 參錢 柏子 參錢 大黃 參錢 後下 丹皮 錢半 菖蒲 錢

半 沒藥 錢半 紅花 貳錢 黃芩 錢半 甘草 捌分 淨煎服

又方 連翹 肆錢 黃柏 貳錢 錦黃 參錢 後下 生梔 參錢

生地 參錢 雲連 錢半 白芍 參錢 忍冬 錢半 甘草 錢半

淨煎服兩服見功 又方 公犀角 錢半 先煎 黃芩 壹錢

山梔 貳錢 銀花 肆錢 川連 壹錢 小生地 壹兩 枳壳 壹

錢 蘇葉 貳錢 元參 肆錢 丹皮 壹錢 花粉 壹錢 鮮竹茹

壹兩 錦黃 肆錢 連翹 錢半 樸耳 錢半 卽川 淨煎服

後下 樸耳也

又方 川連 參錢 蒲公英 肆錢 銀花 肆錢 地丁 貳錢

甘菊 參錢 黃芩 參錢 鬱金 參錢 柴胡 貳錢 天葵 肆錢

菘豆 貳兩 淨煎服 又藥散方 當歸 伍錢 柴胡 壹兩

貳錢 京三稜 伍錢 連翹 伍錢 莪朮 伍錢 炙草 陸錢 黃芩

壹兩 貳錢 一半 酒炒 黃連 參錢 土瓜根 壹兩 赤芍 壹錢 龍

生用 一半 酒炒 黃連 參錢 土瓜根 酒炒 赤芍 壹錢 龍

膽草 壹兩 酒洗 蒼朮 炒 參錢 共研細末 每服柒錢 淨煎服 如

遇急證 則用開水沖服 若倉卒不及 研末 則照方取 十分之二藥 煎服亦可 孕婦忌服

救癰痧法 凡疹痧癰等證 初起必見身熱 沈重 卽用

青蒟葉蘸鹼水，擦前後心。如見有癍點，如蚊蟲咬口，形紅色，擦至黑色，以擦破，流出毒水為度。即用硃砂搽在破口之上，便可。如無生蒟葉，則蒟梗亦可。

又生草藥方

布狗尾

貳拾文

路兜彌

陸文

蘆荻竹筍

捌

文白茅根

貳拾文

榕樹鬚

陸文

垂絲柳

陸文

車前草

陸

文地膽草

參文

生桑葉

柒文

柑樹葉

參文

鬼羽箭

拾

文淨煎服

治大頭瘟

此證頭面腫大，咽喉閉塞，急用

延胡索

錢半

皂角

壹錢

川芎

壹錢

藜蘆

伍分

躑躅花

貳分

共

研細末用紙卷蘸藥吹入鼻中取嚏日三五次甚效
嚏出膿血者更妙無嚏者難治左右看病之人用此
取嚏亦不傳染又方取蚰蚩又名曲鱗十餘條以白糖
拌之放入碗內用碟蓋好半日卽化爲水至遲一日
必化用鴨毛蘸水塗之卽消百發百中之仙方也若
無白糖之處用蚰蚩糞并水調敷亦可愈後須戒殺
生又方用燕子窩連泥帶糞搥融調醋敷之立愈

又方靛花

參錢

以福建靛爲佳雞蛋清壹個燒酒

壹盞調服甚神效

救時疫羊毛瘟法

凡男婦大小陡然心腹疼痛，不過

一兩時卽死，醫藥不及用，鍼灸亦不及施，惟有速往十字街心，或十字路心，千萬衆人日逐往來之處，挖泥土數升，以冷水和丸，如雞蛋大，卽在病人臍旁及心窩內外，摩擦良久，俟泥丸稍熱，破開看之，若丸中有羊毛，則是此證無疑矣，另換泥丸再擦，以不見羊毛爲度，雖已絕氣而身未冷者，皆可救活，若擦之並無羊毛，卽非此證，當另求醫治，或用蕎麪，照上法治之，更妙，或用白毛烏骨雞，破開去腸襖，勿用撲水洗。

在病人心上，卽愈，或再以雞血塗心上，亦可，并用雞

肉煮湯食，極效。或用癩蝦蟆，卽蟾破開撲心上，亦

愈。愈後，須戒殺放生，免再傳染。蝦蟆眼紅腹無八字紋者勿用。

治時疫羊毛疔法：初起，頭痛身發寒熱，前心坎後背

心有紅點如疹子形，急先用鍼挑破，取出羊毛，再用

明雄末貳錢青布包紮，蘸熱酒在前心坎瘡上一二

寸外，四圍團團擦之，漸漸擦入瘡眼，其毛卽奔至後

背心再發，於後背心照前擦之，其羊毛俱拔於布上，

卽埋入土中，內服菊花飲，或蔥白飲，地丁飲等藥，卽

愈。菊花飲方。用白菊花葉連根。搗取自然汁壹碗。或壹茶盃。滾酒沖服。或用酒煮服。亦可以生汁爲妙。如毒重者。多飲。蓋被取汗。其毒自散。并用渣敷患處。留頭一孔。不敷。無花葉。則用根。無根。則用藥店之乾白菊花肆兩。甘草肆錢。酒煮溫服。

辟疫法。

用硫磺銀硃二味等分。

不可以

新瓦燒藥。放

在房內。關閉窗戶。門熏之。可除疫氣。及死鼠氣味。

治疫氣傳染方。

凡入患疫之家。感其氣入鼻內。卽時

佈散經絡。初覺頭痛喉乾。急用芥菜子研末。溫水調

末填入肚臍中、隔衣一兩層、以壺盛大熱水、開水亦可頻頻熨之、至汗出自愈。

辟疫香粉

生大黃

錢半

甘草

伍分

皂角

壹錢

丁香

貳

錢

蒼朮

壹錢

檀香

貳錢

山柰

壹錢

甘松

貳錢

細辛

壹

錢

雄黃

壹錢

共研末、用綢小袋、佩戴身上、

辟疫靈符

用黃紙硃書、

玉清文昌大洞真經赦解、

十字、貼門上、并佩戴身上、戒食牛犬肉、可無災疫、

避疫法

平時用貫衆壹兩條、白礬壹兩、烏豆壹撮、同

放水缸內、白礬烏豆宜用夏布小袋裝貯、放缸內、三

四日取出一換，凡到病家看病，先用如意油擦鼻，方可入門。或用雄黃末入鼻，亦可出病家門後，要當逆風處引鼻取嚏，則疫氣不能入矣。或用屈臣氏藥房之辟疫丹一二粒，佩戴衿前，可避疫氣。辟疫丹色白如蓮子樣，每粒十文，到西藥房有賣。或用雄黃末水調，多敷鼻孔中，與病人同牀，亦不傳染，此神方也。或用馬骨一塊，裝紅布小袋內，佩帶身上，男左女右。又方，五更時投烏豆壹大握於井中，勿令人見，凡飲水家俱無傳染之慮。又方，雷丸、大黃各肆兩，飛金薄參拾張，硃砂

余素畏寒藥當疫作時每日服此方亦不見覺其寒足見地氣之熱毒所致也

參錢淨水飛

生明礬壹兩共研末以水爲丸每服貳錢

屢試神效

避疫常服方

凡附近處發疫時而地必有毒氣宜用

白菊花

連翹

菘豆

銀花

甘草

每味三

數文加淨黃土

伍錢

白礬少許每日煎湯合家大小

均飲之體弱者稍少飲或隔日一飲以解毒氣

以上皆吾粵歷年各處經驗之方也竊願醫者守

其成法用以起死人而肉白骨其功顧不偉哉

光緒庚子歸善李澍青雨山氏誌於豐州署齋

附刻論鼠疫當清其源法

何謂鼠疫，疫將作而鼠先斃，人觸其氣，遂成爲疫。蓋地氣暴發，惟鼠得之最先，鼠當中毒之際，熱渴既甚，以水爲可救療，嘗於水缸恣飲滿腹，甚至案上茶杯稍沾餘滴，人不之察，誤食其餘，而受毒遂不淺矣。固不獨目覩斃鼠不及掩鼻，感觸其氣已也。竊思疫氣之作，避之既無可避，防之復不勝防，徒窮其流而不清其源，亦未爲得法。倘聞鄰近鼠死頗多，先於家中牀榻櫥櫃之下，將赤小豆、白蘿蔔、俗呼菜頭、葶藶、俗呼尾梨、清解之物，散佈地上，俾

鼠竊食亦可解免鼠既無恙尙何有穢濁之氣哉所費無多請嘗試之愚昧之見閱者幸勿以爲迂也

附刻

治結核經驗靈方

時疫中人如遇喉閒兩脇大腿夾

內見有結核速將此方塗貼外用青布紮住日換二

三次則核不痛大則漸化小即立消外服清解之劑

自可應驗

山慈姑

貳錢

紫地丁

叁錢

蒲公英

貳錢

鮮瓜簍

伍錢

大青蔥

伍根

大生薑

貳錢

北細辛

伍分

江南香

伍錢

以上各藥共研搗如泥粉同江南香末

調麻油貼之如核十分利害者可加麝香壹貳釐方

能透發藥力倘延緩太久核毒已潰亦不濟事

又方 生半夏 貳錢 天南星 貳錢 山慈姑 叁錢 鹹蛋土

壹撮 赤小豆 貳錢 加茶油二滴 沖蔥湯塗之

又方 紅藍花 壹錢 錦紋黃 肆錢 蒲公英 陸錢 川麝香

伍釐 白樟腦 壹分 雄黃精 壹分 細爛草 壹錢 共七味

杵勻、調甘草水敷患處、其核漸消、不痛為度